


蜀中名勝記

卷

至自拾拾五

風陵文庫
文庫19
F 70
5



蜀中名勝記卷之十

閩中曹學佺能始著

川西道

龍安府 平武縣附郭

顧野王輿地志云陰平縣本漢梓潼縣地晉人流寓於蜀者仍於益州立北陰平郡西魏廢帝二年定蜀改北陰平為龍安魏志景元四年諸軍攻蜀鄧艾自陰平行無入之地七百里鑿山通道作橋閣山高谷深至為險難艾以氊自裹縛而下將士攀木緣崖魚貫而進先登至江油卽此地晉於此置平武縣志



云唐宋之龍州在雍村壩梁李龍遷築城於此魏置
州遺址尚存雍村壩者宋紹定進士郡人雍繁孫有
文學見所製文昌祠碑村因此名今之郡治則樂平
鎮也蒲規修造記云通階秦路嚴禁出入與劍門關
爲比 唐許棠送龍州樊使君詩曾見邛人說龍
州地未深碧溪飛白鳥紅旆映青林土產唯宜藥王
租只貢金政成閑宴日誰伴使君吟李洞送龍州田
使君詩御札軫西陲龍州出牧時度關雲作雪挂棧
水成澌劍淬號猿岸弓懸宿鶴枝江燈混星斗山木
亂槍旗鎖庫休稱藥開樓又見詩無因陪宴集吟苦

憶京師頂斯龍州與韓將軍夜會詩庭綠草纖纖邊
州白露沾別歌緣劍起客淚是愁添見月猿啼樹迴
風雪滿簾將軍盡尊酒樓上賦星占李洞亂後龍州
送鄭郎中兼寄鄭侍御詩侍車登疊嶂經亂集鵠原
省壞蘭終潔臺寒柏有根縣晴江入峽樓靜雪連村
莫隱匡山社機雲受晉恩又龍州送裴秀才詩違拜
旆旗前松陰路半千樓衝高雪會驛閉亂雲眼勝掛
臨江省名題赴宅筵人求新蜀賦應貴浣花牋宋邵
稽仲詩峭壁陰森古木稠亂山深處指龍州猿啼鷓
噪溪雲暮不見愁人亦自愁 方輿勝覽龍州倅廳

有吏隱堂僉判趙眾詩滿耳江聲滿目山此身疑不在人寰民舍古意村村靜吏束刑書日日閒司馬君實和云四望逶迤萬疊山微通雲棧訪雲鬢誰知吏道堪棲隱未必人間有此閒范景仁和云花陰掃榻常欹枕月色侵門不下關因誦君詩想佳景夜涼依約夢魂閒 寰宇記云龍穴山在陰平縣東北五十里古老相傳此山有龍鬪死血變爲石宋齊於此置龍血戍李膺益州記云龍血東有龍像巖絕壁約萬餘丈有四石龍在壁間今尤可驗巖之東北有洞穴莫測深淺泉出其下 又云馬閣山在陰平縣北六

十里北接梁山西接岷峨昔鄧艾伐蜀從景谷路徑龍州江油縣至此懸崖絕壁乃束馬懸車作棧閣方得路通因名馬閣山 龍門志云竇子明遇仙處在縣西北九十里今仙女舖是宋理宗寶祐閒有人於小溪山下見二女子冉冉升雲而去異香經日不散龍安新志又云仙女洞在治南江村口山勢盤旋巖洞深邃水自中出百里流入劍南故老相傳每風日清和遙見仙女靚粧游行巖上或理髮或浣衣於洞壑中隱顯不常人跡罕到洞中石乳融結狀甚奇怪色如碧玉最可供玩 道教靈驗記云梁武陵王

經理益州使李龍遷築城於牛心山龍遷既歿便葬
山側鄉里立祠號李古人廟唐初改爲觀其後武氏
革命鑿斷山脈明皇幸蜀有老人蘇坦奏曰龍州牛
心山國之祖墓今日蒙塵之禍乃則天掘鑿所致明
皇卽令刺史蘇邈併工修填如舊明年誅祿山復宮
闕至德二年乃升龍州爲都督府號靈應郡僖宗幸
蜀宗子李特請遣道士醮山祈福禮有加焉按唐書
高祖紀七世祖曰暲爲梁昭武王生歆歆生重耳重
耳生熙熙生天錫天錫生虎虎生昞昞生淵是爲高
祖虎當西魏時賜姓大野氏是虎祗仕西魏亦非仕

梁也此說不知何據 陰平修路記云龍安棧閣在
治東者曰石城曰佛厓曰麻園曰墓頤曰黃林曰三
店原曰七里卽左檐也曰飛仙已上凡八在東南者
曰石回曰興文卽袁烈婦投厓處曰猿臂在東北者
曰秦隴曰東閣已上凡五在治東者曰金鼓以形肖
也曰芭蕉曰楮株曰盧厓監司盧姓者所修曰天井
曰桑坪曰兜索曰木蕊曰飛泉已上凡九在治西北
者曰金匱曰桐油曰隆奉曰胡空曰黃梗曰劉村曰
鵝頂曰禪峰曰石門曰仙女曰馬桑曰溪壩曰黑水
曰羅漢曰羊腸已上凡十有九

江油縣

古江油郡及縣今平武之江油舖是以江水所由故元遷江油於武都興教鎮則今縣也 方輿勝覽云太白臺在江油縣太白與江油尉往來故有臺在尉亭蒲翰為之記其贈江油主簿詩云嵐光深院裏傍砌水冷洽野燕巢官舍溪雲入古廳日斜孤吏過簾捲亂峰青五色神仙尉焚香讀道經為米芾書刻在縣衙志云縣西二里有山接彰明界高聳亭亭形如匡字此大匡山也又云南二十里點燈山即彰明之小匡山上有太白祠 寰宇記云涪水在縣北一

里自松州崆峒山出西北至州界南入綿州界益州記云陰平縣有左擔道其路至險擔在左肩不得度右肩也鄧艾由此伐蜀勝覽云左擔路上涪水崖壁有閣道六曰青崖曰墓頤曰石回曰七里曰東閣曰石城即陰平所記者又縣有二閣曰黃臂曰黃林不在左擔之數 寰宇記云石門在江油縣東百里有石門成漢水記云與氏分界於石門仇池成去石門四百餘里左思蜀都賦云緣以劍閣阻以石門顧野王輿地志云石門在褒中之北漢中之西今按其山兩邊有石壁相對望之如門鄧艾伐蜀歷此 寰宇

記云天池山在州南百三十里高九十二丈上有池周迴二十三步其水常滿號曰天池本名石人山天寶六年勅改爲靈液山 勝覽云太華山在江油縣南百四十里有三峰奇怪碑目云弘真觀古碑在江油縣南百三十四里太華山之登真觀此碑最古不記撰人姓名按此山卽羣仙錄所載黃奉仙隱處

石泉縣


漢靈帝以汶江蠶陵廣柔三縣立汶山郡廣柔卽今之石泉也志云縣北二里有泉甘冽崖上刻甘泉古蹟四字此縣名之始 唐屬茂州宋神宗時靜州夷

寇邊攻茂州窰隴東以孤石泉成都守孫羲叟經畫事宜以石泉爲邑介綿茂之間道里闊遠緩急不相應非扼其衝要不足捍外患於是詔改石泉縣爲軍按新編張上行字道從漢州德陽人登元豐第習於邊計後會石泉夷犯邊朝廷命羲叟帥蜀召公問計公引唐王涯傳云吐蕃有兩道一由龍安青川縣一由綿州威蕃柵取抵雞城皆虜之險要今石泉三十里威蕃亭地名柵底卽唐之威蕃柵宜先築堡寨以禦其來次陞石泉爲軍以重其權然後調思黔義軍以制其暴則取功一時爲利後世不然蜀之憂未艾

也義叟盡用其策 石泉圖經國乎眾山之隈林巒
叢菁樵蘇恣取不食地利而生計亦足 寰宇記縣
蜀山史記黃帝子昌意娶蜀山氏女蓋此山也 郡
國志云石紐山今在石泉縣南帝王世紀以爲鯀納
有莘氏胸臆圻而生禹於石紐郡人以禹六月六日
生是日熏修裸享歲以爲常水經注云石紐夷人共
營之地方百里不敢居牧有罪逃野捕之者不逼能
藏三年不爲人得則共原之言大禹之神所祐也碑
目云禹穴二字大徑八尺李太白書刻在絕壁上
又云石泉縣有周萬歲通天碑前內供奉書手王惠

元書其石擊之清亮全類玉音碑陰有段文昌留題
在報恩光孝觀又云誓水柱在治西四十五里河岸
柱高丈許圍五尺前人恐水衝縣故立此誓之未詳
年代

蜀中名勝卷之十終



蜀中名勝記卷之十一

閩中曹學佺能始著

上川南道

嘉定州

水經曰江水至犍爲武陽縣青衣水沫水從西南來
 合而注之酈道元注云江水又東南逕南安縣西有
 熊耳峽連山競險接嶺爭高河平中山崩地震江水
 逆流懸瓖有灘名壘坻亦曰鹽瓖李冰所平也縣治
 青衣江會襟帶二水焉 華陽國志云青衣有沫水
 出蒙山下伏行地中會江南安觸山脇溷崖水脈漂

疾破害舟船歷代患之李冰發卒鑿平溷崖通正水道或曰冰鑿崖時水神怒冰乃操刀入水中與神鬪至今蒙福按漢書溝洫志蜀守李冰鑿離隼避沫水之患晉灼云隼古堆字卽此 寰宇記云青衣水發源自蘆山徼外東南流逕嚴道洪雅夾江至龍游與岷江合沫水發源大渡河一名峩水自陽山縣流入江按青衣沫水合流在州西十五里俗名尖山其下爲紙房楮薄如蟬翼而質堅可久 通志云嘉定州治在兩川合流之際晉郭璞所定治東有八卦井卽璞所鑿 水經注云蜀王開明故治也來敏本蜀論

曰荆人鼈令死其尸隨水上荆人求之不得鼈令至汶山下邑復生起見望帝望帝者杜宇也從天下女子朱利自江源出爲宇妻遂王於蜀號曰望帝望帝立鼈令以爲相時巫山峽壅而蜀水不流帝使鼈令鑿巫峽通水蜀得陸處望帝自以德不若遂以國禪號曰開明 蜀記云古夜郎國傳爲一女人浣溪有竹浮下中有啼聲取而視之則孩也及長呼爲夜郎封竹溪王今治北三里有竹公溪 按宋祁答勸農李淵宗嘉州江上見寄詩嘉州路牂峩接畫船山圍杜宇國江入夜郎天卽詠此事又輿地廣記云

漢武帝開夜郎置犍爲郡漢書地理志夜郎故縣乃屬牂柯郡如此則今之嘉州犍爲縣非夜郎故地矣後世徒見嘉州名犍爲郡又領犍爲縣遂以爲夜郎國恐失真 蜀志補鑄云嘉州十五景唐貞觀中刺史盧士瑄記曰望雲峰曰西嶺精舍曰石梁水曰後壑曰分溪塘曰桂竹汀曰梭原曰茗岡曰六渡潭曰長林閣曰望山臺曰青菴徑曰山樞園曰石壑院曰南洲草堂併賦詩刻之石上宋鄧諫從云天下山水窟有二曰嘉定曰桂林鮮于繪議道堂記云漢嘉背負三峩襟帶二江爲西南州最清峻處 海錄碎事

載僞蜀歐陽柳得嘉州曰青山綠水中有二千石作詩飲酒爲風月主人豈不佳哉其後太守呂昌朝以宋復古所畫八景圖皆天下名勝懸於州治與相映發蘇子瞻有八咏繼東吳之贈也 蜀都賦云戶有橘柚之園注曰出犍爲南安縣華陽國志南安有柑橘官社出名茶 寰宇記云有石碑山山上遍植海棠爲郡守宴賞之地一名海棠山花譜云海棠有色無香惟蜀之嘉州者有香 吳中復戒石云嘉州出荔枝輿地紀勝有荔枝樓愛日齋叢抄云乾道間陸放翁取家藏前輩筆札盡刻石置荔枝樓下 方輿

勝覽云梨花山過西津橋五里有梨花百餘樹人寒疾取此花食之卽愈岑參過西津王判官所居詩勝迹不在遠愛君池館幽素懷茗中語宛得塵外遊通志云蓮花山在治東八里山陽有溪四時不涸產蓮花爲盛樓臺亭榭雅與勝會者曰都督府唐丁邵序云犀灘古地熊阜外虞長空青冥通波萬里曰郡齋平望江山岑參詩山光圍一郡江月照千家曰丁東院在州學前院有方響洞洞腹有水如環珮聲黃魯直詩古人題作丁東水自古丁東直至今我爲更名方響洞信知山水有清音范成大詩隔凡

水磻不可越眾眞微步壺中月徙倚含風玉佩聲何須聽作蕤賓鐵自注云漢嘉廣佛院中水洞有聲琅然莫知其所由來舊名丁東水山谷易今名且有詩也石介詩云萬樹芙蓉秋色裏千家方響月明中曰澄江樓在憲司左窺龍泓右瞰烏尤高明爽塏得江山之趣涓祐間提刑程逢辰摹刻蘇子瞻書其外祖程公逸事於此曰月明樓在譙樓之右下瞰明月湖郭璞識云鬱姑鬱姑將州對洛都但看千載後變成明月湖後隋鬱姑將軍開此湖也洛都山名在州西五里曰壁津樓宋郡守游仲鴻建魏了翁記

在治東南跨城爲樓下瞰江流三峩九頂森列左右
曰萬景樓在高標山上高標一名高望郡之主山
也有弘明觀後周所剏隋大業末方製大殿塑飛天
神王像無名氏記其神異甚詳樓爲宋郡守呂由誠
建宇文粹中記范成大云嘉州城中山上登覽勝絕
殆冠西川予令畫工作圖以歸山谷山谷來游時但
有安樂園未有此樓也後人立涪翁亭在此樓前
日月榭陸務觀詩試傾萬景湖亭酒來看半輪江月
秋爲同年王子蒼作也註云傍榭有一巖景趣尤佳
子蒼欲作樓未果 曰碧雲亭在石筍之隙楊暉記

云石挺出於山旁高丈有二尺上銳而下廣眾水滙
於前左右視羣山之邈迤若覆盂於地此亭在其上
也 熊耳平羌據其上流寰宇記云熊耳水一名熊
耳峽古老言武侯鑿山開道卽熊耳峽東古道也又
云平羌縣本漢平羌戍在榮州應靈縣界深谷戍是
也周保定年置縣隋大業中獠叛移就大江唐寶曆
中又移於開峽驛道書謂之平羌化山圖經云天下
二十四化之一也有太白亭在焉相傳太白讀書於
此黃魯直作亭其上蘇子瞻詩云峩眉山月半輪秋
影入平羌江水流謫仙此語誰解道請君見月時登

樓石闕堂溪環繞其址郡國志云龍游縣有二石闕卽漢武帝使唐蒙下夜郎置碑目云嘉州舊市鎮石闕上有唐李德裕領重兵過此九字寰宇記云石堂溪水在縣東一里源出溪泉流入明月湖亭退入流花橋會大江薛能石堂溪詩三面枕漁樵前門向郡橋岸沙崩橘柚山徑入茶苗夜擁軍煙合春浮妓舸邀此心無與醉花影莫相饒九頂烏尤傑立捍流方輿勝覽云九頂山在城東有九峰曰集鳳棲鸞靈寶就日丹霞祝融擁翠望雲兌說唐會昌已前峰各有寺今惟存凌雲一寺又名大像寺開元中僧海

通於瀆水沫水濛水三江之合衝濤怒浪之濱鑿山爲彌勒大像高踰三百六十尺建七層閣以覆之至韋臯時積十九年而工始備臯有大像記墨莊漫錄云嘉州凌雲寺大像記韋臯文張綽書其碑甚豐字畫雄偉頌於潘義榮處見之岑參詩寺出飛鳥外青峯戴朱樓搏壁躋半空喜得登上頭始知宇宙闊下看三江流天晴見峩眉如向波上浮迥野煙景豁陰森棕桺稠願割區中緣永從塵外遊回風吹虎穴片雨當龍湫僧房雲濛濛夏月寒颼颼迴合俯近郭寥落見遠舟勝槩無端倪天宮可淹留一官詎足道欲

去令人愁薛能詩像閣與山齊何人置石梯萬煙生
聚落一畹露招提霽月人來下殘陽鶴去棲從邊亦
已極烽火是沉黎司空曙詩春江古寺遶滄波石磴
盤空鳥道過百丈金身開翠壁萬龕燈焰隔煙蘿雲
生客到侵衣濕花落僧禪覆院多不與方袍同結社
下歸塵世竟如何李習凌雲漫興云古寺臨江間碧
波石梯深入白雲窠僧房寂寂無人跡滿地落花春
又過薛濤寄題凌雲寺上韋相公詩聞說凌雲寺裏
苔風高日近絕塵埃橫雲點染芙蓉壁是待詩人賞
月來黃庭堅凌雲記游詩凌雲一笑見桃花三十年

來始到家從此春風春雨後亂隨流水到天涯陸游
凌雲禮佛詩出郭尋幽一笑新旋呼艇子截煙津不
辭疾步登重閣聊欲今生識偉人泉鏡自涵螺髻綠
浪花不犯寶趺塵始知神力無窮盡丈六金身小果
身自註云一泉泓然正在髻下每歲水漲不能及佛
足 碑目云凌雲山麓有唐放生碑山頂有清音亭
邵博記天下山水之勝在蜀蜀之勝在嘉州嘉州之
勝在凌雲寺寺之南山又其勝也蘇子瞻名其亭曰
清音又南山之勝也其下有治易洞東坡磨厓大字
云聖作易晦其數劉傳吳識易祖蓋宋郡守吳秘得

蜀中名勝記 卷之十一
之於劉牧耳 紀勝云烏尤山一名離堆山在九頂山之左舊名烏牛突然水中作犀牛狀至山谷題涪翁亭始謂之烏尤又名烏龍碑目云郭璞移水記謂世主播遷戎羯亂華於是優游笑傲放意山水間乃於嘉州城東百步烏尤山鑿書巖而蘇子由詩亦指其注爾雅於此史謂璞無入蜀之交按移水記有嘉州二字則碑非璞手筆恐後人之附會耳蓋嘉州之名始於後周而自周已前止曰漢嘉郡曰龍游縣耳安得有所謂嘉州哉子由詩云巉巖九頂峰可愛不可住飛舟過山足佛腳見江滸俄頃已不見烏牛在

中渚移州近山陰峭壁上無路云有古郭生此地苦箋註洗硯去殘墨遍水如黑霧至今江上魚頂有遺墨處提刑張方詩竹橋沙水渡烏尤絕壁孤巖意氣驕故與凌雲分半坐僧窗假寐見金焦以其似金焦山故也 青衣石峽循而東去東觀漢記曰元初二年五月青衣蠻唐律歸義註云地在大江青衣二水之會今嘉州龍游縣也寰宇記云青衣津在治南四十里有青衣神益州記云神號雷堆廟卽華陽國志之雷垣也班固以爲離堆下有石室名玉女房蓋此神耳岑參上嘉州青衣山中峰題惠淨上人幽居寄

兵部楊郎中詩引云青衣山在大江之中屹然迥絕
崖壁蒼峭周廣七里長波四匝有惠淨上人廬於山
巔唯繩牀竹杖而已恆持蓮花經十年不下山予因
公浮舟聊一登眺友人夏官弘農楊侯清淡之士也
素工爲文獨立於世與余有方外約每多獨往之意
今者幽躅勝槩歎不得與此公俱爰命小吏刮磨石
壁以識其事乃詩以達楊友爾詩云青衣誰開鑿獨
在水中央浮舟一躋攀側逕緣穹蒼絕頂詣老僧豁
然登上方諸嶺一何小三江奔茫茫蘭若向西開峩
眉正相當猿鳥樂鐘磬松蘿泛天香江雲入袈裟山

月吐繩牀早知清淨理久迺機心忘尙以名宦拘聿
來夷獠鄉吾友不可見鬱爲尙書郎早歲愛丹經留
心向青囊渺渺雲智遠幽幽海懷長勝賞欲與俱引
領遙相望爲政愧無術分憂幸時康君子滿天朝老
夫憶滄浪况值廬山遠抽簪歸法王或云青衣卽烏
尤山然烏尤之廣不能以七里計也 方輿記云東
巖在城東佛峽卽聖岡山薛能詩古蹟是何王平身
入石房遠林通後徑一郡隔前岡晝靜惟禪客春來
有女郎獨醒回不得無事可焚香巖半有洞出泉宜
釀東坡詩一時付與東巖酒卽此陸務觀云能仁院

前有石像高丈餘蓋作大像時稿也詩云江閣欲開
千尺像雲龕先定此規模斜陽徙倚空三歎嘗試成
功自古無 碑目云東津院有黃魯直草書圓照大
師小碑其詩云赤旃檀塔六七級白菡萏花三四枝
禪客相送以彈指此心能有幾人知又云黃太史自
敘南經此其所作墨竹記 予觀嘉州新志城西一
里有揚雄山石洞幽邃相傳以爲子雲遊此有子雲
草亭蔡植詩云獨步城西路蕭條一草亭古苔環徑
碧修竹遶軒青石鑿觀書所碑鐫陋室銘草玄今已
矣千載想儀型東北四十里有麻平河流出千佛崖

與泥溪合王勃麻平曉行詩云百年懷士望千里倦
遊情高低循戍道遠近聽泉聲礪葉纔分色山花不
辨名羈心何處盡風急暮猿清泥溪詩云弭棹臨奔
壑低鞭躡峻岐江濤出岸險峰磴入雲危溜急船紋
亂崖斜騎影移水煙籠翠渚山照落丹厓風生蘋浦
葉露泣竹潭枝泛水雖云美勞歌復誰知

峩眉縣

任豫益州記云峩眉山在南安縣界兩山相對狀如
峩眉張華博物志以爲牙門山也高僧傳昔善財禮
德雲比丘時伉立妙高峰觀此山如初月現故稱峩

眉 李膺益州記云隋開皇九年立峩眉縣以山爲名縣在南安之西峩眉之東唐乾元間獠叛移就峩眉觀東今縣治是也 禹貢梁州之山四岷嶓蔡蒙西山皆岷北皆嶓南山皆蒙峩眉之在禹貢則蒙山之首也 飛玄羽經曰峩眉之山金臺之室飛玄羽經秘其內稽神樞云句曲洞天西通峩眉皆大道也其間有小徑雜路阡陌抄會非一處華陽國志云峩眉山孔子地圖言有仙藥漢武帝遣使者祭之欲致其藥不能得碑目云宋太宗峩眉山普賢殿簡版書天真皇人論道之地楚狂接輿隱迹之鄉按雜花經

云諸佛如來以大悲心而爲體故因於眾生而起大悲因於大悲生菩提心因菩提心成等正覺故我世尊等正覺而有方所說經而有道場普賢於道場開化人天等眾故現相海於峩眉山中密引世人而通菩提覺性 三皇經云皇人者泰帝之所使在峩眉山授皇帝真人五牙之法 費士幾歌鳳臺記云按晉皇甫謐高士傳葛洪神仙傳宋劉孝標注世說皆以接輿爲避楚入蜀隱於峩眉不知所終也 寰宇記云中峩山在峩眉縣南二十里又名覆蓬山有葛仙洞入穴初纔容人行數里漸寬洞中蝙蝠大如箕

小峩山在峩眉縣南三十里一名鐔刃山山有季仙洞是爲三峩 李膺益州記云龍門山在峩眉西十里兩崖峭峙其形如削仰視青天纔餘一罅又云峩眉山下有池廣袤十里號龍池 方輿記云綏山廢縣在峩眉縣西四十里按列仙傳葛由周威王時人好刻木爲牛賣之一日騎木牛見人蜀中王侯追之上綏山綏山在峩眉山西南其高無極隨之者不復還皆得仙道諺曰得綏山一桃雖不得仙亦足以豪 水經註云峩眉山有濛水卽大渡水也水發蒙漢東西流與濛水合逕汶江道呂忱曰濛水出蜀許慎

以爲濛水也從水我聲南至南安入大渡水大渡水又東入江 通志云羅目河出峩眉山麓右溪自小天池以東左溪自黃茅坪以北至羅目廢縣界合二溪之委爲江水石甚奇怪縣址去治西九十里唐麟德置宋省入 寰宇記云隴甯山在羅目縣東南七里神仙傳云宿山圖者隴西人也採藥此山服之羽化 又云嘉樹在羅目縣東南三十里陽山江漑兩樹對植圍各三二尺上引橫枝亘二丈相援連理陰庇百夫其名曰黃葛號嘉樹蘇子由詩予生雖江陽未省到嘉樹卽此 又云夷惜水在羅目縣東北五

十里源出雋州界中有嘉魚長三尺每年二月隨水而下八月逆水而上入穴蜀都賦云嘉魚出於丙穴是也予按名山記峩眉山周匝千里石龕百一十二大洞十二小洞二十八南北有臺凡遊大峩者自縣勝峰門出至華嚴院恰十五里前代於峩眉山剎寺六光相居山絕頂爲遊山之底極華嚴居山之前峰爲遊山之響導而白水寺居其中自白水至光相歷八十四盤山徑如線如是者六十里至峰頂卽普賢示現處屋皆以板爲之予以萬曆辛亥歲遊是山作記云出嘉州之西門爲峩眉徑而峩愈用自遠

遇津焉絕流者二揭衣者一旣入縣縣田食堰水膏液雲油有沃野之稱遇嶺焉閣覆於上宋時建魏華父書也首坡名解脫以出山者釋危就坦至此而盡噫予惡知乎出解脫入解脫耶過此爲華嚴寺卽華嚴嶽爲純陽殿殿前頰谿有石如船水出灌堰石上龍門二字蘇子瞻書又過爲中峰寺卽乾明觀黃魯直居之爲歌鳳臺列仙傳所稱楚狂接輿隱於峩眉山中不知所終也陳希夷福壽字殊俗筆峩石神水亦亡矣又過爲雙飛橋山中橋非一此可稱橋一橋受一水一水自一洞來有黑白之分若挾而舞若搏

而赴勢不相下過橋始狎久之乃濟有石狀如牛心受水所激而成有前後牛心寺前者白水而後者黑水也謂之符文水孫思邈居於白水今之萬年寺卽白水寺由山下至寺一舍而遙倍之而近如循牆自牖以達堂窾每遇一嶺輒如止扉寺前爲四達而內則大宮也其地皆稻田塍埒俯仰隩隈氣候和暖不異於外有蒲氏村蒲人居之云漢蒲公之後蓋權輿是山爾出寺至明月池俗名初喜亭其嶺蔓延行之無盡石磴難數始治終亂騎已絕輿用二十許人昇蹲處於內不能蔽軫劣似輿形者耳首十人不任輿

以舟視輿背如弓繩如絃猶不滿輿者意左右八人翼伸縮如猿臂莫知定向輿首者察路如察脈常苦眩次者如眩師或亟跳出輿外或俛入輿內或同前後左右爲一并計二十人之形如鴻雁木葉偶成文字莫知所以又或作十數層如懸線或擁腫一處如木癭也輿不可以足代足不可以手代扶予行者不善地以善讓於予善在左則棄右者善在右則棄左者亦有時而下下不十上之一輿相詬厲彌甚首者拊不任輿者背如相瞽然留十數人後後者躡石石隨足下擊前者足驚全輿前者交平地欲趨後者未

脫險不能從出初喜亭至化成寺俗名木皮殿徑一
嶺狹束如溝水所流注多磊砢善脫足謂之滑石溝
也由木皮殿至雷洞坪行者禁聲有禁聲碑輿二十
人他輿者半共百五十人俱行箕篠灌莽中若不相
顧若夢與人語而人不應其木連困糾紛或寓或族
或相切磨或自弊死或翹繚而句或無枝而繳每上
一嶺不能半望若青天則有樹立於旁爲客繇役而
恂盱也木皮殿以上磴不能石壘木如馬齒雷洞坪
以上樹不能枝向空如虎爪由雷洞坪至天門石路
詰曲爲八十四盤峭直纒減半梧立當途或出其前

或出其後又或出其左右而環之輿者實則輿向空
久始實輿者空則輿趾礪地有聲而過門以外爲娑
羅坪娑羅其葉冬青其花蒼蘊其色赤白木皮殿以
上皆有之然有雜樹故不之稱稱天門者婆羅樹居
三之二松居其一有一樹枯而復榮定者居之將合
無迹也門內有橋曰天橋有井曰井絡有臺曰光相
臺有鐵瓦殿昔建有銅殿今建有菴以棲禪者予登
乎臺焉其穆穆肅肅者耶其明明斤斤者耶其見乎
蒼蒼之色不在穹窿者耶其於世也悠悠洋洋者耶
前之岷江大出而尾下也背之瓦屋上正而平章也

蜀中名勝記 卷之十一
遠之雪山灑淨而汨沒也予何以知朱明之別於玄
英又何以知臯且之別於辜涂何以知霾曠霹靂之
相終始何以知蟠螭挈貳之自消息又何以知昇日
覆雲之不爲暈氣五采耶又何以知人世之雕繪而
繡錯目眩而心亂者之有異乎此耶噫觀止矣學佳
曰子遊名山多矣直上百里無所因緣則未之聞見
也高出五嶽秀甲九州天竺先生之言也楚人李維
楨述於臺側李公本甯前予守西川也 陳子昂感
遇詩金鼎合神丹世人將見欺飛飛騎羊子胡乃在
峩眉變化固非類芳菲能幾時疲痾苦渝世憂悔日

侵淄眷然顧幽褐白雲空涕洟又浩然坐伺慕吾蜀
有峩眉念與楚狂子悠悠白雲期時哉悲不會涕泣
久連洏夢登綏山穴南采巫山芝探元觀羣化遺世
從雲螭婉變時永矣感悟不見之李白峩眉山詩蜀
國多仙山峩眉邈難匹周流試登覽絕怪安可悉青
冥倚天開彩錯疑畫出冷然紫霞賞果得錦囊術雲
間吟瓊簫石上弄寶瑟平生有微尙歡笑自此畢煙
容如在顏塵累忽相失儻逢騎羊子攜手凌白日鄭
谷峩眉山詩萬仞白雲端經春雪未殘夏消江峽滿
晴照蜀樓寒造境知僧熟歸林認鶴難會須朝闕去

蜀中名勝記 卷之十一
祇有畫圖看賈島送譚遠上人下視白雲時山房掛
樹皮垂枝松落子側頂鶴聽棋清淨從沙劫中終日
未歛金光明本行同侍出峩眉釋皎然思遊峩眉寄
林下諸友詩剛有峩眉念秋來錫欲飛會拋湘寺去
便逐蜀帆歸難世堪言善閑人合見機殷勤別諸友
莫獻楚江薇曹松送僧入蜀過夏詩師言結夏入巴
峰雲水回頭幾萬重五月峩眉須近火木皮嶺上祇
如冬薛能咏峩眉聖燈詩莽莽空中稍稍鐙生看迷
濁變清澄須知火盡煙無益一夜闌邊說向僧 子
有前後峩眉二歌前峩眉山歌金陵爲松谷上人作

云峩眉山上月千里若爲看峩眉山上雪萬古逼人
寒山青如黛雪如粉明月鏡中何隱隱雙峰縹緲誰
畫眉挂在長空不可盡西域雪山絕嶙峋此中應見
西方人普賢菩薩行具足三千徒眾皆應真始信峩
眉自惆悵不作巫山神女身八十四盤娑羅樹花開
如繪復如素一間版屋千重嶺正值行人問山路登
山路轉難投寺日已晚古苔如髮長新松學蓋偃水
窟炊不成雷洞眠難穩真僧入定久行腳乞食遠鉢
裏龍形小巖前鳥聲囀雨氣沉如墨雲光疾似電應
有千化身故作百寶現橋梁宛虹架樓臺疑蜃變天

蜀中名勝記 卷之十一
竺皆騎象星光盡散燕奕奕九微燈芬芬五色緣人
人爲攝受各各覩顏面欲知色是空色卽空中滅世
事如幻影詎必歎奇絕依舊峩眉山明月照清徹君
來白門秋山月幾圓缺浩浩江水流向帶峩眉雪
後遊峩眉歌云君不見太行誠險阻西蜀峩眉羞與
伍又不見雪嶺長晶瑩來映峩眉一段青禹貢蒙山
此稱首梵語勝峰傳日久洞天列在位之七秀色甲
乎州有九君不見軒轅氏跪謁皇人叩玄旨又不見
鬼谷子著書瑤瑤藏洞裏隴西仙人宿山圖採藥山
中顏色殊葛由賣羊從此去接輿歌鳳胡爲乎君不

見子規啼處望帝悲夜啼竹裂人不歸又不見崑崙
伯仲未可分逸少曾詢周撫君唐家子昂稱詞伯青
蓮居士李太白往往見諸吟咏間白頭欲返青山宅
豈是峩眉善妬人江水茫茫難問津我今來遊亦偶
爾不然惆悵蜀國將三春三春花已謝木冰猶未嫁
五月披重裘四時無一夏娑羅鬪雪開松枝受風亞
仙僧如故常客子驚云乍乍見甚遲迴人生不再來
足篆符文水身居光相臺井絡金莖下天門玉蕊開
願言獻北極千秋萬歲杯

夾江縣

青衣水來遶縣界而飛水溪注之溪源出瀑布泉狀如素練李太白所謂瀑布天落半與銀河爭流者耶而鳳凰天馬虎履伏龜諸山或舞或翥或蹲或處左右而挾持之過當縣城下稍平坦宋謝達夫詩兩峰懷抱揖平川張滄湖詩平川麥穗藹如雲過此而東南三十里乃作簾鈎之狀晉張神君所謂日移紅影在簾鈎者此也 道書云平岡化依鳳凰山亦謂之依鳳岡及桐梓林山下有石湫門及石筍雷柱可以禱雨在縣南十里 通志云天馬山其勢飛騰似天馬一曰馬鞍山在縣東二十里 形勝志云青衣水

遶於南黑虎山峙於北 福地記云伏龜山有仙掌洞相傳李阿真人所遺宋人書其壁云跨龍門飲蟹泉摩仙掌扣丹竈 本志云治西二十五里南安鎮卽漢南安縣治有鄧通宅故址前有瑪瑙溪中有磐石可以修禳 寰宇記云夾江縣本漢南安縣地卽封宣虎爲侯之邑隋開皇中分龍游平羌二縣置於涇上臨江水故號夾江按涇水昔秦惠王得蜀移秦人萬家以實之秦人思故鄉水乃呼此水爲涇水也唐天寶六年改爲秦水史記年表宣虎以破臧荼功食邑於此 碑目云漢和帝時開道碑在夾江縣

西青衣越雋道界中有永和七年永和八年等字
又云漢楊宗楊賜墓在夾江縣東十里墓前兩闕其
左右皆隸書 按縣東二十里漢川縣界有亭亭內
碑二通前立二石柱一云漢故益州太守楊府君諱
宗字德仲墓道一云漢故中書令楊府君諱賜字仲
普墓道皆隸書大字 予按楊雄賦云五兀參差左
太冲賦躡五兀之蹇澹本志以爲縣之北隅五兀山
後漢書費貽宅著草生焉常有五色雲氣覆其上
貽益不屈於公孫述者犍爲郡之夾江人

洪雅縣

離堆川流東西屈曲百三十里而後入大江所謂洪
雅川也 碑曰云古夷獠誓碑在洪雅縣市中又云
漢靈帝時張道陵碑在洪雅之易俗鄉有嘉平二年
三月一日等字 此縣之十里修文山山卽雅江所
注驚湍怒濤名曰龍潭漁者不敢入 又二十里其
地多竹爲竹箐山石磴梯磴盤折而上唐宋所設也
又十里爲隱蒙山晉處士龐居正字隱蒙隱此
又二十里爲花溪發源自瓦屋山與青衣合可望雪
嶺積雪經年不化范中宣詩雲堆雪嶺鋪銀界日射
金仙照碧津 又廿里思經山則與雅安分界矣山

趾有廢嚴道縣基其上阿叱山瀑布千仞響撼山谷
有巨石上鐫羅漢一百有八 縣之東南有金釜山
下臨平羌江古老相傳昔有主簿於此煉金丹故曰
金釜山亦名主簿山

犍爲縣

左思蜀都賦東越玉津註云江出璧玉故名華陽國
志蜀有七津之一也今之犍爲縣兼有玉津縣矣陸
務觀舟過玉津詩玻瓈江上送殘春疊鼓催帆過玉
津宋白爲玉津令貽田表聖詩玉津縣裏三年悶金
粟山前九月愁又云竹裏衙人吏花間押簿書 今

縣治在沉犀山上寰宇記云昔有犀牛渡江到此而沉
一名沉犀灘志云沉犀洞在沉犀山下上有赤壁數
丈下有玄水千尺 縣有石人蜀記云昔諸葛亮征
蠻中十里刻一石人今黎嶺之路尙有存者陳羽城
下聞夷歌詩犍爲城下牂柯路空冢灘西賈客舟此
夜可憐江上月夷歌銅鼓不勝愁 郭璞記云犍爲
縣北百里書樓山是孔子背書樓 本志云子雲城
在縣南三十里昔楊子雲避亂於此後人增築爲城
今水月寺是其故址俗譌爲紫雲城 碑目云孝女
碑在犍爲縣清溪口楊洪山下東漢永建初孝女叔

先雄以父尼和墮湍水尸喪不歸於溺處自投水死
後五日與父屍相持浮江上郡表言爲雄立碑宋元
祐中重立本志云清水溪在縣南十里流至孝女渡
人江 神異傳云趙昱嘗隱青城山隋煬帝起爲嘉
州太守時犍爲潭中有老蛟爲害昱率甲士千人夾
江鼓譟持刀入水有頃江水盡赤昱左手執蛟首右
手持刀奮波而出隋亂隱去不知所終後嘉州水漲
人有見昱青霧中騎白馬從數獵者於波而過宋太
宗封神勇大將軍廟食灌江口 碑目云犍爲縣東
南四十里有唐大佛寺寺中菊坡二大字乃袁天綱

筆 通志云宋邵博墓在犍爲縣博爲制置司參議
卒葬於此本志云康節嘗言世亂惟蜀可居宣和末
伯溫攜家人蜀止於嘉州今犍爲之紫陽城是其故
業矣 杜甫宿青谿驛奉懷張員外十五兄之緒詩
漾舟千山內日入泊荒渚我生本飄飄今復在何許
石根青楓林猿鳥聚儂侶月明遊子靜畏虎不得語
中夜懷友朋乾坤此深阻浩蕩前後間佳期赴荆楚
自註云青谿驛在嘉州犍爲縣崔塗秋日犍爲道中
詩久客厭歧路出門吟且悲平生未到處落日獨行
時芳草不長綠故人無重期那堪更南渡鄉國已天

涯范成大健爲江樓詩河邊堵立看歸篷三老開頭
暮欲東漲水稠灘連峽內淺山浮石似湘中無人驛
路榛榛草有客江樓浩浩風種落塵消少公事贖裁
新句寄詩筒蘇軾健爲王氏書樓詩樹林幽翠滿山
谷樓觀突兀起江濱云是昔人藏書處磊落萬卷今
生塵江邊日出紅霞散綺牕畫閣青氛氲山猿悲嘯
谷泉響野鳥嘒憂巖花春借問主人今何在被甲遠
戍長苦辛先登搏戰事斬馘區區何者爲三墳書生
古亦有戰陣葛巾羽扇揮三軍古人不見悲世俗回
首蒼山空白雲

威遠縣

縣有中峰峰巒峭拔又有中溪溪水幽清寰宇記云
東十五里葛仙山古志相傳葛仙翁曾遊其地志云
舊設觀仙臺碑刻剝落矣 山居錄云威遠李圃淳
熙中以忠州別駕歸隱白茅山中築秀發齋吟咏自
適齋銘曰前山特秀入我牕戶朝來無致起我幽趣
望天雨之澄明何迷途之獨悟搢頤終日爲蝶爲周
兩忘之矣聊舉以自障豈世塵之能污行歌山中採
其薇矣雲外飛鴻悠然來去而弋人何慕哉

榮縣

蜀地不宜松而榮州之松獨著紀勝曰榮黎松樹如龍盤陸游詩桫根橫走松倒植故擅有其奇狀矣曰榮黎曰榮隱曰榮德所謂三榮也寰宇記云榮黎山在州東十五里山上有龍池池上有松如盤龍竹亦有如龍形者俗謂之羅漢杖碑目云榮黎山古寺碑唐元和禱雨碑俱在本山 紀勝云榮隱山在州西三十里一名石筠無名氏石刻云筠山高極入穹蒼人道虎爲殃行人過此不曾傷咸陽宮闕在平地高鹿食人無數計吁嗟苛政猛於虎斯言垂萬古古有榮隱先生修道於此石室猶存碑目有榮隱山修

道觀石碑 方輿云榮德山在州東北四十二里州以此得名其山在谷中獨拔五百餘丈中有希夷觀老君祠刻石爲像有小路至山巔以木爲梯半山有唐刺史薛高丘磨崖碑碑自云開元二十年刺史薛高丘立多載僊靈事今已磨滅本志云榮德山爲陳搏修真處又名希夷山有石室二十四及龍池千葉蓮 唐劉兼初至郡詩嘉陵江畔接榮川兩岸旌旗下瀨船郡印已分炎瘴地朝衣猶惹御爐煙蓮塘小飲香隨艇月榭高吟水壓天錦字莫嫌歸路遠華夷一統太平年又有去年今日詩云去年今日到榮州

五騎紅塵入郡樓，
貔虎只知迎太守。
蠻夷不信是儒流，
奸豪已息時。
將秦疲瘵全蘇，
歲又周聖主。
若容辭重祿，
便歸煙水狎羣鷗。
碑目有唐貞元二年建榮縣碑，
今移植於東橋。
有榮州院碑，
偽蜀司倉參軍苟延慶撰。
本志云：蓮宇山在學宮後，
有宋人九域圖碑。
城東桂林山舊縣學有衡陽王書文明碑。
碑目又云：真義侯碑在本廟。
唐元和二年建，
舊經云：卽古蜀將獨孤白馬二人廟也。
又云：大周聖德勒石碑在州治子城門外。
長安三年章綰撰文。
劉兼登郡樓詩：偶奉綸書蒞旭川，
郡樓佳致盡依然。
松敲鳥道雲藏

寺月滿漁舟，
水浸天。
望帝古祠花簇簇，
錦城歸路草芊芊。
有時倚檻垂雙袂，
故國風光似眼前。
陸務觀自序其詞云：三榮郡治之西，
因子城作樓，
觀曰高齋。下臨山村，
蕭然如世外。予留十日，
被命參成都戎，
幙而去。臨行，
徙倚竟日，
作桃源憶故人一首，
所謂衰翁老去，
疏榮利絕，
愛山城無事時。城北有橫溪閣，
務觀閣上小宴沁園春詞引云：
橫溪閣者跨於雙溪之上也。
一自西來其水濁，
一自東來其水清。
二水合流於城下，
爲閣以頰之。其北鳳鳴山，
則黃魯直所題。榮川祖無大師此君軒在焉。
紀勝云：鳳鳴之竹多茂實。


言此竹結實有鳳來棲也魯直詩云王師學琴三十年響如清夜落澗泉有酒如澗客滿門不可一日無此君當時寺栽數寸碧聲挾風雨今連雲此君傾蓋如故舊骨相奇怪清且秀程嬰杵曰立孤難伯夷叔齊采薇瘦霜鐘堂上弄秋月微風入絃此君說君家周彥筆如椽此君語意當能傳 勝覽云龍洞在州東南四里真如院巖穴峭深洞左石壁奇聳巨柏老蒼洞右有石角立舊經以爲孫登嘯臺三者乃榮之勝處陸游詩嘯臺載酒雲生屨仙穴尋梅雨墊巾碑曰云嘯臺磨崖記宋隆興元年端午日榮守太史公

李燾仁父書 予攷諸傳記所載榮雖山谷間實爲郡國一都會青陽門記云榮州有青陽洞以少昊國在其北門今正臨之故名按史黃帝子玄囂封於青陽國爲少昊金天氏少昊降居江水國於青陽以金德王位在西方集覽云江水在蜀青陽是也 宋崔仰之送人牧榮州詩山色臨巴迥江流入漢青 志云邑東榮川卽古遯水河岸有竹王祠蓋以祀夜郎王者蜀記云昔有女人於溪浣紗有大竹流水上觸之有孕後生一子自立爲王以竹爲姓漢武使唐蒙伐牂柯斬竹王土人不忘其本立竹王廟歲必祠之

不爾爲人患薛濤題竹郎廟云竹郎廟前多古木夕陽沉沉山更綠何處江村有笛聲聲盡是迎郎曲
漢地理志云縣有滇池周迴三百里水出駿馬日行五百里事同大宛又有馬鳴戍益州記云漢刺史韋拔夜過此地聞神馬嘶漢中馬嘶以應之故有此戍 成都市九州要記云和義郡古夜郎之地武帝時開南中使樊道令通樊青衣道無功唐蒙將殺之令曰恨不見成都市而死蒙卽立市如成都以殺之故曰成都市按和義郡本屬瀘州寰宇記云唐貞觀八年割屬榮州 志云城西清富山有古榮王府按

周榮公封國之後唐憲宗封其子曠宋眞宗封子德雍孝宗封子光宗甯宗封子曦俱曰榮王縣舊有綾錦村杏春村皆宋藩封故迹也 朝野雜記天子卽位嘗所領州鎮自防禦州而下皆陞軍名若節鎮州則建爲府光宗自榮州刺史進封榮王而榮州不錫軍名蓋中書之誤也南渡後始陞爲紹興府 宋名臣傳載李昉爲國子直講求郡晨登講席諸生見昉巾兩焰火起是日報得榮州蓋時亦甚重之矣

蜀中名勝記卷之十一終



蜀中名勝記卷之十二

閩中曹學佺能始著

眉州

賈島送穆少府知眉州詩劍門倚清漢君昔未曾過
日暮行人少山深異鳥多
狄啼知峽雨棧盡到江波
一路白雲裏飛泉灑薜蘿
李頻眉州別李使君詩回
首雪峯前朱門心杳然
離人自嗚咽流水莫潺湲
毒草通蠻徼秋林近漏天
一生從此去五字有誰憐
薛濤送鄭眉州詩雨暗眉山
江水流離人掩袂立高樓
雙旌千騎駢東陌獨有羅敷
望上頭趙抃按獄眉山

舟行詩携琴曉出錦官城千里秋原一望平放舸急
流身覺快披雲孤嶼眼增明農田雨後畦畦綠漁笛
風前曲曲清訊獄遠邦先滌慮郵哉休戚在民情蘇
軾寄黎眉州詩膠西高處望西川應在孤雲落照邊
瓦屋寒堆春後雪峩眉翠掃雨餘天治經方及春秋
學好士今無六一賢且待淵明賦歸去共將詩酒趁
流年黃庭堅次韻子瞻寄眉山王宣義詩參軍但有
四立壁初無臨江千木奴白頭不是折腰具桐帽棕
鞵稱老夫滄江鷗鷺野心性陰壑虎豹雄牙鬚鸛鶴
作裘初服在猩血染帶鄰翁無昨來杜鵑勸歸去更

得把酒聽提壺當今人材不乏使天上二老須人扶
兒無飽飯尙勤讀婦無複禪且著襦社饗可漉溪可
漁更問黃雞肥與癯林間醉着聞伐木猶夢官下人
追呼萬釘圍腰莫愛渠富貴安能潤黃墟 郡有孫
氏書樓魏了翁記曰孫氏居眉以姓著自唐迄今人
物之懿史不絕書而爲樓以儲書則由長孺始樓建
於唐之開元至光啟元年僖宗御武德殿書書樓二
字賜之今石本尙存自僞蜀毀於災乃遷魚鮒其居
爲佛氏所廬今所謂傳燈院是也若里巷則固以書
樓名長孺之五世孫降衷嘗遊河洛識藝祖皇帝於

龍潛建隆初召至便殿賜衣帶圭田特授眉州別駕
因市監書萬卷以還然樓尙未復也別駕之孫闢乃
入都傳東壁西籬之副與官本市書捆載而歸卽所
居復起重樓藏之魚鮒之有樓則昉乎此又嘗除塾
爲師徒講肄之所號山學於是士負笈景從而書樓
山學聞名於時矣方樓之再建也在天聖初闢之從
兄直講君堪嘗爲作記錢內翰希白宋景文子京皆
賦詩闢性倜儻不耐衣冠衣方服其卒也從弟文懿
公爲識其窳有不儒其身而儒其心之語故里人又
以儒心名之比歲樓又燬於火書僅有存者儒心之

六世孫曰某懼忝厥世乃更諸爽塏以唐僖宗所書
樓刻揭之樓視舊增拓焉且病所儲之未廣走行闕
下傳抄貿易以補闕遺竭其餘力山學載興以余二
十年雅故請書厥顛未余曰惟昔人藏書之盛鮮有
久而弗厄者梁隋之盛或壞於火或覆於砥柱唐太
玄文昭之盛或毀於盜或散於遷徙本朝之初如江
源叔所藏合江南吳越之書凡數萬卷而子孫不能
有之爲臧僕盜去與市人裂之以藉物者不可勝數
余偶過安陸亦得其省中所藏晉史則佚於他人者
可知安陸張氏得江書最多其貧也一篋之富僅供

蜀中名勝記 卷之十二 三
一炊王文康初相周世宗多得唐舊書李立正所藏亦爲一時之冠而子孫皆不克守宋宣獻兼有畢文簡楊文莊二家書可敵中秘之藏而元符中蕩爲烟埃晁文元累世之蓄校讐是正視諸家爲精自中原無事時已有火厄至政和甲午之灾尺素不存劉壯輿家於廬山之陽所儲亦博今其子孫無聞焉南陽井氏積書凡五十篋則盡歸諸晁氏嗚呼斯非天地神人之所靳者耶而孫氏之傳獨能於三百年間屢絕而復興則斯不亦可尙矣夫雖然余嘗聞長老言書之未有印本也士得一書則口誦而手抄惟恐失

之其傳之難蓋若此惟傳之難故誦之精思之切辨之審信之篤行之果自唐末五季以來始爲印書極於近世而閩浙廣蜀之鋟梓徧天下加以傳說日繁萃數益廣大綱小目彪列臚分後生晚學開卷瞭然苟有小慧纖能則皆能襲而取之噫是不過出入口耳四寸間爾若聖賢所以迭相授受若合符節者果爲何事而學之於人果爲何用則謾不加省然則雖充厨厨几於我何加焉可不甚懼矣夫按書樓復興雖在魚鮒江而始創則在州城也今蜀中書賈之家往往稱書樓蓋本諸此 有石氏畫苑蘇軾記曰石

康伯字幼安眉之眉山人故紫微舍人昌言之幼子也舉進士不第卽棄去當以蔭得官亦不就讀書作詩以自娛而已不求人知獨好法書名畫古器異物遇有所見脫衣輟食求之不問有無居京師四十年出入閭巷未嘗騎馬在稠人中耳目謾謾然專求其所好長七尺髯而黑如世所畫道人劍客而徒步塵埃中若有所營不知者以爲異人也又善滑稽巧發微中旁人抵掌絕倒而幼安淡然不變色與人遊知其急難甚於爲己有客於京師而病者輒舁置其家親飲食之歿則棺斂之無難色凡識幼安者皆知其

如此而余獨深知之幼安識慮甚遠獨口不言耳今年六十二狀貌如四十許人須三尺郁然無一莖白者此豈徒然者哉爲亳州職官與富鄭公俱得罪者其子夷庚也其家書畫數百軸取其毫末雜碎者以冊編之謂之石氏畫苑幼安與文與可遊如兄弟故得其畫爲多而余亦喜其畫古木叢竹因以遺之使置之苑中 有三蘇祠在紗縠行卽蘇氏故宅也門前榆樹云老泉手植奇恠礪礪人爭取去爲假山魏了翁知眉時祭公文曰眉號士大夫郡聖天子不以某不肖莫守此土其在境內凡百辟卿士有益於民

夙夜承祀無忒矧爲山川炳靈世載蘇氏一翁二季
先後相望文章事業在太史之典策今居郡滿歲顧
歲時奉嘗闕然弗講非所以厲賢崇化律我有民也用修
圭薦展於廡下以內翰太師文忠公黃門太師文定
公從祀旣齊旣稷神保攸歆敢不永與多士承繹斯
文以無忘德 有觀蓮亭在祠西池中環臺皆蓮中
有碑刻東坡小像李龍眠畫山谷穎濱贊今移入寢
方輿勝覽云臨風閣在州治內宋沈迥詩烟霞生
座右林沼匝城隈州園十咏邵博著環湖在署後魏
了翁築翠洞書臺遠景樓在州治北太守黎錞建蘇

軾記通志云雪臺在遠景樓前亦希聲築 本志云
東北二里有洛城後漢時築蜀漢廢齊通城在城北
南齊建武置隋開皇廢碑目云唐眉州剏羅城記大
順二年盧拯撰文畧云象耳鎮於後峩眉列乎前勝
覽云嘉祐閣枕羅城繪三蘇於上刻東坡和陶詩於
壁間宋史唐末山行章攝眉郡守值四方驛騷乃合
五縣之力築城周遭八里有奇計一千八百六十五
丈名臥牛城淳化中李順之變攻圍不下及順誅守
者以城完受賞焉 通義志云昔人評吾州山不高
而秀水不深而清列眉通衢平直廣衍夾以槐柳綠

陰翳然小南門城村家多竹籬桃樹春色可愛橋之下流皆花竹楊柳泛舟其間鄉人謂之小桃源蘇子瞻詩清江入城郭小圃生微瀾子由詩彷彿城南路繁香撲市橋 通志云醴泉山在治西八里環繞州城山半有八角井清甘如醴松江在治東南自蜀江分派西南流至州城與醴泉江合 方輿云蜀江在城外一名玻瓈江水色清澈似之陸游詩云玻瓈江水千丈深不如江上離人心君行未過青衣縣妾心先到峨眉陰金尊共酌不知曉月落烟渚天橫參車輪無角留不住馬蹄不方何處尋空憑尺素寄幽恨

縱有綠綺誰知音愁來只欲掩屏睡無奈夢斷聞疏砧范成大和云玻瓈江頭春水深別時沄沄流到今祇言日遠易排遣不道相思翻苦心烏頭可自我可去菖花易青君易尋人生若未免離別不如碌碌無知音蘇軾送楊孟容詩我家峨眉陰與子同一邦相望六十里共飲玻瓈江後人因立共飲亭又改爲江鄉館在津口 陸務觀詩玻瓈江上柳如絲行樂家家要及時只惟今朝空巷出使君人日宴墓頤墓頤山在江東七里狀如墓頤因名有至德觀有爾朱淘丹泉傳記所載以爲軒轅氏丹宅山腹有穴曰龍洞

傳者以爲四目老翁唐末有楊太虛得道於此今祠
中有三仙像四目居中焉人日出東郊渡江遊墓頤
山眉之故事也春風樓明霞閣俱在山上 蜀檮杌
云僖宗幸蜀政事悉出內侍田令孜之手左拾遺孟
昭圖上疏論事坐貶令孜遣人投之墓頤津後人立
祠唐裴澈詩云一章何罪灰何名千載惟君與屈平
從此蜀江烟雨夜杜鵑應作兩般聲本志云孟拾遺
祠在墓頤山上今廢 志又云老翁泉在墓頤山東
二十里蘇明允嘉祐集云十數年前月夜有一老翁
蒼頭白髮偃息泉上就之則隱而入於泉洵贊以石

建亭覆之而爲之銘曰山起東北翼爲南西涓涓斯
泉溢溢以彌歛以爲井可飲萬夫里無斯人將此爲
誰山空寂寥或嘯而嘻更千萬年自潔自好誰其知
之乃訖遇我惟我與爾將遂不泯無竭無濁以永千
祀梅聖俞寄蘇明允詩泉上有老人隱見不可常蘇
子居其間飲水樂未央淵中必有魚與子自徇羊淵
中苟無魚子特翫滄浪日月不知老家有雛鳳凰百
鳥戢羽翼不滯彼泉傍 蘇軾送賈訥倅眉二首云
當年入蜀嘆空回未見峩眉肯再來童子遙知頌孺
袴使君先已洗樽壘鹿頭北望應逢鴈人日東郊尙

有梅我老不堪歌樂職後生試覓子淵才又云老翁山下玉淵迴手植青松三萬栽父老得書知我在小軒臨水爲君開試看一一龍蛇活更聽蕭蕭風雨哀便與甘棠同不翦蒼髯白甲待歸來自註先君葬於墓頤山之東二十餘里地名老翁泉君許爲一往感歎之深故及之也外史立羽張大齡志云歐陽永叔爲明允作志銘云公葬於彭山之安鎮鄉可龍里在今墓頤山之東地名石龍柳家溝老翁泉之側或石可二字易誤嘉靖壬子臺史喻公按眉問老泉墓檄有司求所在而修復之上下彭眉間數月竟無所得

於是從老翁泉之傍設一虛塚青神余修撰承勛記其事於石又有廣福寺者乃勅賜門下侍郎蘇轍香火院也宋故事宰相得賜寺院薦福文定入相時有賜貶官後章呂盡追奪之復官手詔再賜自爲文記之人以爲墳必在賜院之近又乃就寺之後山更作一塚顧穎濱記中云墳之西南十餘步有泉焉廣深不及尋晝夜漢湧又曰墳東南四里許有故伽藍轍以請於朝則前所修泉傍者差是而廣福之墳非也但廣福傍有古桂樹橫陰一畝大十圍亦非近代物若明允之族譜亭則在州西南古修文鄉蘇氏祖塋

側今亭廢刻石亦不存矣 碑目云天池院去眉山縣十里蘇文忠公嘗過之今柱上有手書云自老翁井還偶憇治平丁未十二月七日子瞻凡十八字勝覽云石佛山在眉山之南蘇子瞻寄子由詩卜田向何許石佛山下路下有爾家川千畦種秔稌山泉宅龍蜃平地流膏乳志云猪龍泉在治南石佛鎮曾有牝猪伏於此化二鯉蓋猪龍也詳見恠異記中志又云孫抃墓在石佛鎮乾明寺前按乾明寺在魚鰾鎮孫學士書樓山學碑藏寺中卽宋賜孫公抃薦福地也 志又云大旺山在東南五十里自驀頤山南

趨或起或伏至此峰巒屹立迴拱州城蓋與三峩氣接矣 勝覽云息臺山在治西四十里東館鎮北太平廣記載眉州有叟嘗携子入此山遇一道人指其子曰天叟飲道人已長跪求壽道人取簿檢視曰壽止十八叟與其子懇求不已乃舉筆改爲八十後子壽果如數焉 志云大明寺近東館鎮隋建有九樓十八殿屋厦三千井亦四十八眼基跡猶存又有燈壁寺在東館鄉宋紹興建有東館書院紹興初眉州學者甚多州學不能容東館鄉士大夫呂君玘做古鄉校剏爲學廟春秋釋奠以鄉士夫居家者主之丹

稜令馮時行爲之記 志又云連鰲山在治南九十里山形如鰲傍卽栖雲寺東坡少時讀書寺中嘗於石厓上作連鰲山三字大如屋宇雄勁飛動其畫專車今存

青神縣

益州記曰青衣神號爲雷堆廟班固以爲離堆也蜀江至此始有峽之稱華陽國志望帝以熊耳爲後戶熊耳峽卽今之縣治矣郡國志云漢武帝使唐蒙破西南夷路始於此邑也 志云青州城梁置在治南十五里古青神郡縣皆治此自熊耳山視之今當爲

百花鎮黃山谷集云青神尉廳葺城頭舊屋作借景亭下瞰史家園水竹終日寂然了無人迹又當綠陰之間戲作長句云當官借景未傷民恰似鑿池取明月葢尉乃雅安張禮介卿山谷之中表也 志云縣東門外有青羊橋相傳老子騎青羊過此而入成都又云長泉鎮有麒麟橋王蜀時麒麟見於此因立麒麟院又云縣西瑞草橋橋崩得殘碑乃蘇東坡與丈人丈母書也東坡外家在是所謂相望六十里共飲玻瓈江矣後洪雅主簿王宣義謝事家居於此東坡贈之詩云歸來瑞草橋邊路獨遊還佩平生壺 縣

之名勝在乎三巖三巖者上巖中巖下巖也今惟稱中巖焉自縣解維始由芙蓉溪以兩岸多芙蓉也繼由五渡溪以溪水曲折凡五渡也又過慈姥磯有石刻李壁詩云洗盡一春歌酒塵滄江吹破碧粼粼韶華過眼都如夢祇有三峰是故人泊舟直抵下巖有題名云子瞻子由與侃師至此院僧以路險見止不知僕之所歷有百倍於此者矣丁未正月二十日書沿溪數折有喚魚潭上卽慈姥巖也篆刻中巖二大字徑可四尺河南邵博書陸務觀詩云春枕悠然夢何許兩枝筇杖喚魚潭又跋程伯正誼所藏山谷帖

云此卷不應攜在長安逆旅中亦非貴人席帽金絡馬傳呼入省時所觀程子他日幅巾筇杖渡青衣江相羊喚魚潭清泉翠樾之間與山人掃石置風爐煮蒙頂紫茁然後出此卷共讀乃稱爾過潭循山三里始至寺爲中巖其傍有羅漢洞卽牛頭僧以木鑰叩石筍處此地懸巖峭壁上刻千佛石覆如屋中有臥仙之迹有玉泉坎黃山谷銘云玉泉坎坎來自重險發源無所龍口琬琰我來峽中初酌蛙頷靈湫世鮮百泉莫與比甘山僧瀆拙煮餅馨香遠拂淪茗泉味不揜行爲白虹止爲方鑑矢其明德用勒蒼厓其

上巖去中巖一里許唐末有佛刹號垂拱寺相傳巖
下有龍聽僧講經於此由是建寺有三石筍唐無盡
禪師伏虎在石筍下所謂伏虎臺也范成大詩赤巖
倚玲嶸翠邏森成削岑蔚嵐氣重稀間暑光薄聊尋
大士處往扣洞門鑰雙撐紫玉關中矗翠雲幄應供
華藏海歸坐寶樓閣無法可示人但見雨花落不知
龍湫勝何似魚潭樂夜深山四來人靜天一握驚看
松桂白月影到林壑門前六月江世界塵漠漠寶瓶
有甘露一滴洗煩濁捫天援斗杓請爲諸君酌 山
谷題名云元豐庚辰歲秋多雨其八月戊午晴遊慈

姥巖禮諾巨那尊者巖下有泉發山足奔突色如乳
而味甘取之不竭豈巨那所奉供耶余因竭其舊水
涓滌見石少焉復盈坎瀼瀼投澗中喚魚潭投齋餘
飯魚出食者數百見人不驚 眉山程逢時跋余玠
詩云相公平賊後携吏上崢嶸裴晉公以後無此奇
遇醉翁行樂處草木皆可敬歐陽子而後世無此樂
先生晉公德業文忠詞章書史精妙視鍾王有逸氣
而於山林悠然心會殆伯仲之間有裴歐也試語山
靈自有宇宙便有此山幾曾有此客耶 邵溥來紹
興元年五日旦從其弟博任也 資中張方自漢川

易節益部將母游弟嵩午猶子觀復二子知復甥何
杓侍眉山蘇禮偕來嘉定壬午二月旣望 金華楊
緯被命赴闕艤舟巖下敬信尊者香火而去紹熙壬
子孟冬九日弟綜及男師復師晉同至 河陽郭忠
得之行部嘉眉艤舟巖下携子遊中巖瞻拜尊者過
憇石笋庵歷覽勝境奇哉政和八年六月三日 里
人任逢被旨赴闕長子商輅侍行親友送別笋峰者
三十有九人嘉定丁丑十月癸酉 邑人楊大全被
旨進朝將家來修淨供宗黨親朋會別於此者五十
五人紹熙三年九月旦 谷居翁大丞相趙公留題

淳祐壬子鄉貢方於此題名巖寺奎書適從天來是
秋楊巽冠外省史夢錫在選中以山英靈發越愈大
浚儀趙公握奎平岡繼偕南宮第一之客明年端午
合邑士楊興仁申錫柄仲夢炎懌森孫侯國史朝瑞
彪錫王鉞文起之巽已程方何明磨崖大書以侈盛
舉以開方來 慶元戊午冬高公純遣姪魏了翁赴
龍飛策試艤舟來遊男載夏卿文卿定子姪遊侍行
越三年載定子褰褐行都復侍親過此弟夏卿文卿
林卿長弟淞同山下飲作伴留又二年癸丑秋十月
了翁蒙恩召除侍東去舍於眉信於青衣明日孫真

蜀中名勝記 卷之十一
勤飲餞於此兄弟之偕行者如戊午獨伯仲不與紹
定己丑六月丙午 郡人蘇薰侍諸父率四弟以嘉
定戊寅上元日游誦坡翁江山風月本無常主閒者
便是主人語信然也弟黨書 愁霖貫序人心久鬱
秋季之旦晴景開霽草木悅茂江山清新太子宫史
籍聖源命前王穆伯恭及前進士楊穎臣廷芳進士
程戩景貺羽衣李有慶仲祥出邑東津亭方舸南下
登石徑數里遊中巖僧居清晏薄暮間道而歸試校
書郎領簿馮越石君玉俛識其時乃嘉祐丁酉之歲
也景貺題 辛亥歲予友楚人鍾惺來遊作記云去

青神西南十五里江色盡綠玉中邊皆見隔岸坐立
數山若架閣者中巖也巖下上連延可十數里許迴
流峻壁冥壑複磴竹樹蒙籠大要向背往復皆與此
巖終始渡江卽水月樓樓趾齧江寺冠之由樓視江
則已瀕由寺登樓乃反降階垂窮與樓湊階代樓爲
梯者強半揣本齊末度樓之腰猶未能至乎寺趾也
降自樓出山門右行不見江則摩磴如蟻屢折爲喚
魚潭魚聽掌出石壁百仞立而微瀕潭漱其脛石無
完膚有邵伯溫大書可模並壁行數武爲羅漢洞洞
低曲僂而入如行牛角中隙處稍右則爲伏虎巖鑿

巖爲百千萬億佛如恒河沙數巖之半跨壑爲一小石橋銜木其壁爲閣若居人架竹梁上以承燕巢者人屈曲行其下沿緣洞壑俯仰竹石者數里曰此走井研富順道也巖又半爲流杯池一曰太極池有屋數楹屋後爲泉泉流洞中石壁四周有黃魯直大小三石刻壁間宋元刻頗多每兩石縫接處往往上下各截其半中嵌俗筆亦有居石隙苟完者出洞緣磴行輿步數代去所謂羅漢洞伏虎巖者度可三四里乃復覩前鑿巖佛像須眉厯厯可數才隔一壑尋樞可度疑前此一段途徑可省矣大抵喚魚潭以往行

皆壑石壁夾之若斫壑若溪藤蘿蘚蔽壑中若荇藻老樹如槎根若石猿鳥往來若遊魚特無水耳諸峰暎帶時讓時爭時違時應時拒時迎哀益避就準形匠心橫豎參錯各有妙理不可思議又行里許蹭蹬拾級乃睹古中巖題額去三石笋不遠所謂諾詎那尊者引牛頭僧持鑰扣石笋笋開得低頭佛盜珠是也鍾子曰自中巖至尊者巖從下視上頂踵腹背其石脈皆當爲笋笋隙且平處則置屋仄則鑿磴斷則爲橋處危臨深則設石欄欄則復見江從江中望巖上僧舍佛刹雖一居之內前軒後寢纍纍綴高壁上

下疊而不覺其前後通也登巖行屋中皆磴道乃稍得其要領趾後竟卽摩前頂石笋中分處如一門尊者像處其中右旋復爲佛殿殿傍一笋屹若浮屠與中分者而三實一笋也人直指其巋然三峰者爲石笋耳笋上宋元刻亦多俗書災石者亦復倍之萬厯辛亥十月二十一日晚霽與弟恬及艾子登於中巖焉禮諾詎那尊者畢說偈偈曰偶爾喪珠復返急時扣鑰相求未免勞勞多事世尊不合低頭又曰未必衣珠眞失總緣巖石當開自供羅漢遊戲不管山僧往來說偈訖返 予凡三過中巖皆有詩其一云中

巖如化出秀色類烟含到鳥無歸路游魚或泳潭泉聲隨地有石筍與天參若作此山長於心無不堪其二云再識中巖好彌添乍到情泉流因委曲雨氣益淒清橋險必當度樓虛何所成唯應石筍上安坐學無生其三云莫謂客來數聊無塵俗牽巖光浮落日梅意入初年手揭碑文古身行洞穴連白魚灘最急且宿在灘前蓋予最後游同青神令康君視搨山谷諸碑刻又自梓州牛頭洞來故及之

彭山縣

揚雄蜀記秦惠王遣張儀司馬錯伐蜀蜀王開明拒

戰不利退走武陽獲之卽此地也郡國志云漢元光四年益州刺史任安城武陽周圍千三百丈本志云今之舊土城是有任公橋後漢朱褒獲麟於馬頰嶺因改名爲麒麟橋 漢犍爲郡理本志云治西北五里犍爲城漢建元中築碑目云漢犍爲太守楊洪碑在彭山縣北小板橋五十年前餘楊洪碑三字今皆磨滅 華陽國志云郡去成都百五十里渡大江昔人作大橋曰漢安橋廣一里半每秋夏水盛斷絕歲歲修理百姓苦之建安二十一年太守南陽李嚴乃鑿天社山尋江通車道省橋梁三津吏民悅之嚴因

更造起府寺觀壯麗爲一州勝字其地東接江陽南接朱提北接蜀郡西接廣漢按晉永和中於此置西江陽郡 初唐沈宇武陽送別詩云菊黃蘆白雁初飛羌笛胡琴淚滿衣送君腸斷秋江水一去東流何日歸 郭璞江賦云流二江於岷嶽註岷山北江所出岷山邛嶽山也中江所出皆東注於大江 寰宇記云岷嶽山在縣東北十二里導江從山南合流下有漢張綱墓志云墓在岷嶽山東百五十步漢書綱字文紀犍爲武陽人仕廣陵太守平賊黨張嬰有恩卒之日嬰率其徒五百人送喪還武陽負土成墳而

去按岷峽二山在漢巖道界其尾入江 雲笈七籤
云第五北平治在眉州彭山縣上有池水縱橫二百
步昔越人王子喬得仙處碑目云此山有大書北平
山治之碑餘不可讀碑陰書大唐上元二年道士施
仕衡等字本志云北四十里北平治應室宿上有天
柱峰夜常見五色燈山下有王喬墓唐杜光庭詩桐
柏真人曾此居焚香屋下誦靈書朝回時宴三山客
瀾盡閒飛五色魚天柱一峰凝碧玉神燈千點散紅
蕖寶芝常在知誰得好駕金蟾入太虛 南中八郡
志云犍爲有魚鳥津數百步一名彭女津在彭亡山

南導江皂江等水會處彭祖塚及祠在此後漢岑彭
爲刺客所中而歿又名彭亡山亦名平模山郡國志
謂之朝女山云昔有朝祖女子此山得道今足跡尙
存故名志云山距治北十二里曰彭女彭模平模平
無皆一山 神異記云犍爲有一白虎出則衆黑虎
隨之不傷人物漢王褒招碧雞神詞黃龍見兮白虎
仁蓋指此也寰宇記引秦昭王射白虎事非 李膺
益州記云周德旣衰九鼎淪散一沒于此或見其鼻
故名鼎鼻山一名打鼻山上有城亦名鼎鼻打鼻音
近也大江過于山下有灘宋將朱齡石伐蜀立寨于

此括地志云鼎鼻山北有龍洲東接導江水按已上
卽常璩所稱王喬升其北山彭祖家其彭蒙白虎仁
于廣德寶鼎見于江漑也 漢書綏和五年犍爲人
上寶磬十六此地因謂之寶磬洲 益部耆舊傳朱
遵武陽人仕爲功曹率兵拒公孫述絆馬歿贈復漢
將軍有祠 後漢建安二十四年黃龍見武陽赤水
九日劉氏以爲瑞應因立廟在長江村導江東岸碑
目云漢刻黃龍甘露之碑在彭山黃龍鎮今移于繫
龍橋周地圖記云彭山縣北四里有潭水後漢漢安
元年仙人瞿君武入峨眉山得道每年繫龍于灘麗

籍詩巢鳳閣邊勞遠夢繫龍灘下認前題按已上卽
常璩所稱犍爲上寶磬十六劉向以爲美化所降後
漢朱遵拒公孫述光武以爲士大夫郡建安末年黃
龍見武陽赤水蜀人以爲劉氏之瑞應也 寰宇記
云金華山在彭山縣東五里有丈六佛像夜多神燈
紀勝云彭山東北六里盤石山普照寺藏有宋太
宗眞宗仁宗御書崖之半有石室范鎮詩云窮幽訪
盤石細徑入荒涼踏葉履痕濕觸花衣袂香 方輿
云平蓋山在彭山縣北二十四化之一也七籤云山
下有玉人長一丈三尺昔吳郡崔孝通于此學道得

飛仙本志云平蓋治上應婁嶺治前洗墨池唐隱士羅公遠題詠之處有清暉滌覽二亭提刑張方記以爲在鼎鼻山椒而勾氏之逍遙軒恰與之相對也杜光庭詩云勢壓長江空八陣吳都仙客此修真寒江向晚波濤急深洞無風草木春江上玉人應可見洞中仙鹿已來馴龍車鳳輦非難遇只要塵心早出塵亡名氏詩云平蓋山高古木疏昔人曾此築仙居井通八角寒泉湧觀燬三清劫火餘洗墨池邊丹竈冷繫龍巖畔石潭虛吟成獨坐荒苔上間看蝸牛學篆書 七籤云本竹觀在彭山治北相傳以爲竹林黃

帝所手植者杜允庭詩云樓閣層層觀此山軒軒朱檻一躋攀碑刊古篆龍蛇動洞接諸天日月閑帝子影堂香漠漠真人丹澗水潺潺掃空隻竹今何在只恐披波去不還 楊祐甫彭山十事記一日象耳山二日彭祖宅三日大悲道場四日寶硯磨鍼二溪五日太白書臺有石刻太白留題云夜來月下卧醒花影零亂滿人襟袖疑如濯魄于水壺也杜光庭詩山中猶有讀書臺風掃晴嵐畫障開花月水壺依舊在青蓮居士幾時來六日師悟志栖二大士會昌寺七日薛范二詩八日龍池蠙泉九日干歲松柏十日石

恪畫護法神 志云縣東北二十五里有磨鍼溪在象耳山下相傳李白讀書山中學未成棄去適過是溪逢老媪方磨鐵杵問何爲曰欲作鍼耳白感其言遂還卒業媪自言武姓傍有武氏崖薛能過象耳山詩一色青松幾萬栽異香薰路帶花開山門欲別心潛願更到蜀中還到來又到處逢山便欲登自疑身作往來僧徒行至此三千里不是有緣應不能文同題象耳山寺詩轉谷縈巖路始窮隔林遙望一門通溪山俱在見聞外臺殿盡藏懷抱中像閣衆恩明海日經幢瓔珞撼天風勞生又逐輕舸去珍重高僧解

苦空 碑目云縣北四十里有古塔刻云唐中和三年浴佛日知玄禪師自成都遊峨眉還至此山愛其幽僻遂庵立於上名曰知玄庵 按已上卽酈道元所稱武陽龍尾仙者羽化之所神棲白雲屬想芳流藉念泉鄉遺詠在茲也 寰宇記云馮翊王廟在縣五里古老相傳有漢馮翊王郭子明墓按漢書功臣非賜姓者不得封王恐此非實又漢武帝遣拔胡將軍郭昌再度入蜀討南夷昌字子明漢紀云武帝元封六年益州昆明反使將軍郭昌擊之或卽是此人 碑目云彭山縣東三十里有宋師中碑云梁武陵

王蕭紀寓此練兵欲東下故後人為立武陵寺 方輿記云縣界有樂黎城唐開元十道要略云漢何斌為蜀郡太守理於此時郡邑凋殘人物窮困乃以已祿米施惠百姓此數城之民由是獲存臨別百姓以白米倍填曰荷君父之恩無以報後之州郡有職田始於此矣

丹稜縣

志云赤崖山在治北二十里高聳赤色如鳥旂之狀拱翼縣治雖林木叢茂不能蔽之縣以此得名也其下即多稜川矣 漁隱叢話云花卿冢在丹稜之東

館鎮至今猶顯英氣血食其鄉按花欽字敬定本關中人唐至德間從崔光遠入蜀討段子璋有功後平寇亂單騎鏖戰喪其元猶操戈至東館鎮下馬沃盥適遇浣紗女謂曰無頭何以盥為遂自僵仆居民葬之溪上廟祀不絕宋封為忠應公邵博云州西有花將軍廟廟史以匣藏唐至德元年十月鄭丞相誥云花敬定將軍也謝皇羽花卿冢行云濕雲糝糊埋秋空雨青沙白丹稜東莓苔陰陰草茸茸云是花卿古來冢花卿舊事人所知花卿古冢知者誰精靈未歸白日西廟鴉啄肉枝上啼緜州柘黃魂正飛 本志

云縣北十五里龍鵠山三大字宋孝宗書也有松柏
山碑記云山有三宮九觀乃成無爲楊正見李鍊師
成道處唐天寶年建杜光庭題龍鵠山詩抽得閒身
伴瘦筇亂敲青碧喚蛟龍道人掃徑收松子缺月初
懸天柱峰李燾詩曰已作清時鳥倦飛杜鵑何事更
催歸似嫌住處猶城郭不解携家隱翠微其子壁詩
云蕭條白日閉巖扃留作遊人萬古情猶有山中舊
時鹿舉頭如聽讀書聲 此縣有楊素翁者奇士從
黃魯直遊盡刻杜子美兩川詩於眉山所謂大雅堂
也魯直記曰余謫居黔州盡書子美夔峽兩川諸詩

以遺丹稜素翁俾刻諸石使大雅遺音久湮沒而復
盈三巴之耳素翁乃作高屋廣楹以庇此石因請名
焉余名之曰大雅堂仍爲作記其畧云由子美來四
百餘年斯文委地文章之士隨世所能傑出時輩未
有升子美之堂者况室家之好耶余嘗欲忻然會意
箋以數語終以汨沒世俗初不暇給雖然子美詩妙
在無意於文而意已至非廣之以國風雅頌深之以
離騷九歌安能咀嚼其意味闐然而入其門耶故使
後輩自求之則得之深矣使後之登大雅堂者能以
余說而求之思過半矣彼喜穿鑿者棄其大指取其

發興於所遇林泉人物草木蟲魚以為物物皆有所託如世間商度隱語者則子美之詩委地矣

蜀中名勝記卷之十三

蜀中名勝記卷之十三

閩中曹學佺能始著

邛州

漢書張騫自河源歸來得高節竹植於邛山故名邛來郡國志云邛崃山自沉黎直走千里至臨邛環抱為鎮山圖經云山曰邛來浸曰邛水民曰邛民竹曰邛竹 水經註云江水又逕臨邛縣王莽之監邛也莽改成都為導江太守為卒正時公孫述為導江卒正治臨邛志云廢公孫述城在州南十里 華陽國志張儀城臨邛周迴六里高五丈其制與城都郫

同 寰宇記卓王孫宅在州南五里基方十里耕者
往往得銅錢按史記卓氏之先趙人秦破趙遷卓氏
夫妻推輦而出曰吾聞岷山之下沃野下有蹲鴟乃
求遠遷致之臨邛華陽國志臨邛有古石山出石礦
大如蒜子火燒合之成流支鍊甚剛因置鍊官有鍊
祖廟漢文帝以鍊銅賜侍郎鄧通通假名卓王孫歲
取千匹故王孫貨累巨萬億鄧通錢亦盡天下寰宇
記鍊山鑄錢卽此山也山出木蓮不異水之芬芳
史記司馬相如成都人素與臨邛令王吉善相如往
舍都亭王吉日往朝卓王孫聞令有貴客爲具召之

并召令酒酣令前奏琴曰竊聞長卿好之願以自娛
相如爲鼓一再行是時卓王孫有女文君新寡好音
故相如以琴心挑之相如時從車騎甚都文君竊從
戶窺心悅而好之相如乃令侍人重賜文君侍者通
殷勤文君夜奔相如與俱之成都 采蘭雜志載文
君閨中一井文君手汲則甘香沐浴則滑澤鮮好他
人汲之與常井同本志云白鶴驛有文君井水作酒
味釋無可送李少府之任臨邛詩邛南才作尉調補
一何卑發論惟公幹承家乃帝枝山長風裏棧江蔭
石和澌舊井王孫宅還尋獨有期陸務觀詩落魄西

州泥酒杯酒酣幾度上琴臺青鞋自笑無拘束又向
文君井上來 水經註云江水又與文井江會李冰
所導也江上有長堤堤跨四十里有朱亭亭南有青
城山山上有嘉穀山下有蹲鴟卽芋也所謂下有蹲
鴟至老不饑卓氏之所以樂遠徙歟 酈道元又云
文井江至蜀郡臨邛與布濮水合華陽國志云布濮
水自布濮來合文井江有火井夜時光映上昭民欲
其火先以家火投之頃許如雷聲火焰出通耀數十
里以竹筒盛其焰藏之可拽行終日不滅也井有二
水取井火煮之一斛水得五斛鹽家火煮之得無幾

也博物志云臨邛火井諸葛丞相往視之後火轉盛
蜀都賦云火井沉熒於幽泉是也隋置火井縣於此
舊史云袁天罡爲火井令殘碑尙存有斷其龜趺以
作益盎者立斃圖經云天罡嘗登山相縣治其處有
相臺山文同寄太傅孫公遊火井詩七盤磴道與雲
浮下見高林壓縣樓元時始省入州 張說被使在
蜀詩卽今三伏盡尙自客臨邛歸途千里外秋月定
相逢李頻送友人之蜀詩天際蜀門開西看舉別杯
何人不異禮上客自懷才夜澗青林發秋江綠水來
臨邛行樂處莫道白頭回唐求送友人歸邛州詩鶴

鳴山下去滿篋荷瑤琨放馬荒田草看碑古寺門漸
寒沙上雨欲暝水邊村莫忘分襟處梅花撲酒樽又
邛州水亭夜讌送顧非熊之官詩寂寞邛城夜寒塘
對庾樓蜀關蟬已噪秦樹葉應秋道路連天遠笙歌
到曉愁不堪分袂後殘月正如鈎又發邛州寄友人
詩茫茫驅一馬自歎又何之出郭見山處待船逢雨
時曉雞鳴野店寒葉墮秋枝寂寞前程去間吟欲共
誰李商隱寄蜀客詩君到臨邛問酒壚近來還有長
卿無金微卻是無情物不許文君憶故夫梅堯臣送
錢駕部知邛州詩細雨梅初熟輕寒麥已秋路危趨

劍道夢穩過刀州秦粟非吳食巴粳類越疇當壚無
復舊試似長卿求范鎮送文與可通判邛州詩半刺
爲官美臨邛自古名何言緹軾寵更侍版輿行仙籍
新年貴賓僚舊日榮壺漿故父老應在半途迎王安
石送文與可通判邛州詩文翁出治蜀蜀士始文章
司馬唱成都嗣音得王揚犖犖漢守孫千秋起相望
操筆賦上林脫巾選爲郎擁書天祿閣奇字校偏傍
忽乘駟馬車牛酒過故鄉問君行何爲關隴正繁霜
中和助宣布循吏綴前芳豈特爲親榮區區誇一方
鶴山在城西七里常璩云臨邛名山曰四明亦曰

羣羊卽今白鶴也漢胡安常於山中乘白鶴仙去弟子卽其處建白鶴臺魏華父營造記曰州之西直治城十里所有山曰白鶴林麓蒼翠江流縈紆蔚爲是州之望隋唐迄今庵院凡十四所遠有胡安先生授易之洞近有常公諫議讀書之庵泉有滴珠樹有木蓮白鶴有臺玉兔有踪中峰信美平雲之觀西巖翠屏萬竹之境皆山中勝處壁間繪像率范瓊杜措丘文播諸人名筆雖丹青剝落而筆法具在本山志云前輩丹青則有任子逸范瓊與夫文同湖州之遺筆文人詞翰則有鄭少微張公庠與夫張商英王賞趙

雍之舊題至於靈鵲去而臺空玉兔潛而石化此山之有可紀書如此宜其歛西州之勝而爲臨邛無窮之觀也信美亭翠屏閣俱在山頂勾龍庭有信美亭詩鄰罌渡水過西頭東面一亭無限幽火井江潮盤附郭浮圖天際表吾州陸務觀翠屏閣詩把酒孤亭半日留西崖獨擅鶴山秋按益部耆舊傳胡安臨邛人聚徒於白鶴山司馬相如從之受經此縣又有林閭善博學自古天子有輜車之使惟閭與嚴君平知之爲揚雄所師本志云西十里盤陀山有石刻佛像唐人鑄昊師二字其上又有郭汾陽師四字五

代及宋人皆有書墨 又云西三十里萬松亭魏太和中建於山絕頂今僅遺址文同詩云四野豁嘉亭松門夜不扃水邊來伴偈月下殘經又云西百里石盤戍俗呼爲望軍頂昔諸葛武侯駐軍於此 碑目云臨邛令封君遺愛碑陳子昂撰又云大唐邛州臨邛縣花置山寺新造無量壽佛石龕像記朝議郎守太子左贊善大夫前殿中侍御史馬宇撰元祐丁卯十二月立碑又云邛州天慶觀希夷先生詩刻文同跋元豐中元日書

蒲江縣

蒲江者以治枕蒲水也志云南八十步蒲泉方丈許冬燠夏涼四時不涸蒲草生焉有亭覆其上曰蒲亭方輿勝覽云浴丹池在蒲江縣之崇眞觀世傳軒轅修煉於此鶴山集云嘉泰中常有羣鶴西來翔舞於紫極殿之前檻自後間歲一至志云紫極觀在蒲江治內 七籤云主簿山治在邛州蒲江縣界郡主簿王興於此學道得仙一名長秋山南有石室玉堂松柏生其前本志云長秋山有臥牛井昔女冠楊正見修煉於此得石臥牛於下砌井而泉湧出今井碑尚存寰宇記又謂之小可慕山言登此山景慕仙風

非小可也 紀勝云南十五里莫佛鎮相傳漢武帝時有莫將軍征西南夷歸而學佛於此其佛臺前石羊虎尚在居民往往於其處得金銀杜光庭莫公臺詩奇絕巍臺峙蜀流古來人號小瀛洲路通霄漢雲迷晚洞隱魚龍月浸秋舉手摘星河有浪自天圖畫筆無鈎將軍悟卻希夷訣贏得清名萬古留

大邑縣

寰宇云大邑縣唐咸亨三年分益州晉原縣置在鶴鳴山東道書云鶴鳴山二十四化之第三化也應氏宿山有二十四洞應二十四氣洞口約闊三尺深不

可測每過一氣則一洞竅開餘皆不見有七十二穴應七十二候東西二溪出其兩腋太清宮建在頂喙玄真坊建在頂大坪是其背延祥觀在天柱山石柱腰巖是其兩翼冠子山三峰中峰是其尾乃馬成子張道陵昇仙之處杜天師鶴鳴山詩五氣雲龍下泰清三天眞客已功成人間回首山川小天上凌雲劍佩輕花擁石壇何寂寞草平轍迹自分明鹿裘高士如相遇不待巖前鶴有聲文同題鶴鳴化上清宮詩秘宇壓孱顏飛梯上屈盤清流抱山合喬樹夾雲寒地古芝英折巖秋石乳乾飈輪遊底處空自立層壇

東北十五里有青霞峰峰下有碧玉潭劍南詩藁云
青霞嶂碧玉潭皆山水佳處詩云千巖角逐互吞吐
一峰拔起矜崔嵬日光微漏潭見底水氣上薄雲成
堆志云此山常孕雲霧又名霧中山峰頂有金剛足
跡曰金剛臺張翥詩霧山環合自雲川戶有清溪種
玉田萬本桃花不知處幾人曾得問秦年碑目云鶴
鳴山腰柱巖有李陽水篆龜鶴齊年及陳搏草書福
壽大字 勝覽云平雲亭在大邑之靜惠山蓋文忠
范公鎮所居公熙甯間上疏論新法致仕既還蜀窮
山水勝處徜徉此山詩云磴道雖云險肩輿亦可行

坐來知日永立處與雲平本志云靜惠山一名東山
山下土城相傳是蜀漢將軍趙雲築蓋雲嘗防羌於
此有雲墓及廟存 通志云鳳凰山在大邑西八十
里勝覽云鳳凰山有虎擘泉唐契覺道人結菴於此
有虎爲之擘地出泉有柏十圍根盤巨石之上如騎
鯨然曰騎鯨柏文同邛州鳳凰山新禪院記云臨邛
郡西北皆大山所叢衍迤磅礴深盤遠走直注大渡
限迤蠻謫鬱如雲烟涌如波濤晴光陰嵐明昧一矚
其間孤峰峯然傑立豪峙首領崖巘腹背聳阜翼開
長巒尾掉高岡繁林茂樹綠蔭纈菜園擁森合粹若

毛羽地志書之曰鳳凰山者蓋前人嘗以狀而名之爾唐有契覺道人芟草鑿址構庵此地日禮華嚴秘典以作佛事嘗汲泉澗下頗念其遠有虎爲之擘地出泉澄潔甘冽悉異他所發源甚盛於今賴之

蜀中名勝記卷之十三

蜀中名勝記卷之十四

雅州

閩中曹學佺能始著

史記秦始皇二十五年滅楚徙嚴王之族以實此地故曰嚴道漢爲縣屬蜀郡文帝徙淮南王之族於此楊用修蜀志補遺引蜀本紀以爲許由之友嚴僖所隱地也 漢高六年分置青衣縣水經青衣水出青衣縣西蒙山東與沫水合註云縣故有青衣羌國竹書紀年梁惠成王十年瑕陽人自秦道岷山青衣水來歸漢武帝天漢四年分沈黎郡置西部都尉主青

蜀中名勝記 卷之十四
衣公孫述之有蜀也青衣不服世祖嘉之建武十九年以爲郡安帝延光元年置蜀郡屬國都尉青衣王子心慕漢制上求內附順帝陽嘉二年改曰漢嘉得此良臣也本志又有邛穀王任君貴越巂人新莽之亂奮集英雄起越巂殺莽所立太守枚根而自立保全一方見西南夷傳按州城隅有任使君廟 晉末李雄竊據夷獠雜居西魏僑立蒙山縣後置雅州郡國志云漢源縣有離堆蜀守李冰所鑿離卽古雅字也州以此名 圖經州治舊在雅安山上大中祥符間國子博士何昌言爲守以地多嵐瘴徙於山之

麓本志云州治後雅安山又名月心山山形如月象心字州治左點所治右點文廟居中皆倚山也 禹貢蔡蒙旅平和夷底績葉少蘊解云蔡在嚴道蒙在漢嘉漢嘉卽嚴道也舊傳諸葛亮於此夢見周公因立文憲王廟遂號周公山按文憲王廟記軍事推官王育撰參軍李夢徵書 周公山半有石筍移之卽雨寰宇記云山勢屹然有龍穴常多陰雲李燾遊蔡山序蜀惟岷山蔡蒙二山雅獨兼有之本志云旅平者禹治水成功旅祭於此俗呼爲落平山頂有萬壑亭在焉 寰宇記云和川路在縣界西去吐蕃大渡

河五日程從大渡河西郭至吐蕃松城四日程羌蠻
混雜連山接野鳥路沿空不知里數卽禹貢所謂和
夷底績也本志云東北有和夷壩是矣 大唐新語
云陸象先爲益州長史奏嘉邛路遠請鑿岷山之南
以從捷近發卒從役居人不堪道亡瘡痍行旅無算
左拾遺張宣明監姚嵩諸軍事兼招慰使親驗艱險
移牒益州曰此路高山臨雲深谷無景至有斗絕巨
險不通人蹤經之者必拊壁傍崖脅息而度雖竟日
登頓二十許里木人猶堪淚下鐵馬亦可蹄穿象先
覽之兢惕遽罷役仍舊路以聞蜀人賴焉 孫漸昭

應廟記云其山蔡蒙其關邛峽水經注云岷山東北
百四十里曰峽山中江所出東注於大江峽山邛峽
山也在漢嘉嚴道縣一曰新道又東百五十里曰岷
山北江所出東注於大江故郭景純江賦曰流二江
於岷峽 圖經云嚴道山在縣南五里本名鹿角
山唐天寶六年勅改爲嚴道山山下有丙穴出嘉魚
方輿云萬勝岡在州西有龍觀寺其趾曰百丈山自
邛峽或起或伏環遠州治本志云諸葛武侯擒孟獲
旋師至此岡下人聚觀之因建亭於上爲龍觀亭
碑目云高孝廉墓碑在嚴道縣東二十里按其碑有

蜀中名勝記 卷之十四
年月乃漢建安十四年立高君兄弟皆孝廉有二石
闕其一曰故益州太守武陰令上計吏舉孝廉諸部
從事高頤字貫方其一曰漢故益州太守陰平都尉
武陽令北府丞舉孝廉高君實字貫光又一大碑其
首云故益州太守高君之碑本志云漢孝廉高君墓
在金雞山下孝廉橋墓跡蕪沒惟二石坊在田中坊
亦以大石堆塚而成非石柱也其一方隸云漢故益
州太守陰平都尉武陽令北府丞舉孝廉高君仍有
數字剝落方輿云金雞山在嚴道北三十五里俗傳
有金雞鳴於此循金雞山而上二百步有石室中有

石像爲爾朱真人宋嘉泰中刻尙存碑目又云羊竇
道碑在嚴道縣東三十里金雞山下漢永初六年碑
也 梁益記云大小漏天在雅州西北山谷高深沉
晦多雨而黎州常多風故謂黎風雅雨宇文溥新路
賦惟天下之至險有嚴道之漏閣焉孤峰上絕於青
天湍波下走於長川斷崖橫壁立之岸飛溜濺千尺
之泉洪造隸釋云蜀郡太守何君閣道碑光武中元
二年刻此碑蜀中近出東漢八分斯爲之首字法方
勁古意有餘如冠章甫而衣縫掖使人起敬不暇雖
敗筆成冢未易窺其藩籬也 碑目云平羌江繩橋

蜀中名勝記 卷之十四
碑在嚴道縣平羌橋有唐咸通十年上官樸所撰碑
字亦隸體今在江濱廟方輿云平羌江源出西徼遠
西北郭謂武侯平羌夷於此又云沫水自廬山發源
注於平羌江與沉黎之陽山江合流 本志云州西
北一里曰清源橋東北十里龍門橋三十五里道遠
壩橋五十里魚喜河橋西七里曰銅頭河橋近多功
路曰大繩橋已上皆索橋也凡橋每歲仲春於兩岸
各樹兩臬長二丈有奇臬上橫穿二柵上布竹繩巨
兩岸繩之餘者屈垂向下轆轤絞束復橫以木梯布
以篾笆周以欄索其高低闊狹視江爲度唐獨孤及

索橋贊

其名曰索

相引一索人綴其上如猿之縛轉帖入

淵如鳶之落尋橦而上如魚之躍頃刻不戒實無底

壑卽此橋也 錄異記云唐王果謫雅州刺史經平

羌江中望巖腹有鑊棺欲墜緣崖視其碑曰地裂山

崩水漂我臨及長江危欲墮欲墮不墮遇王果五百

年後改葬我乃改葬之 本志云州北百四十里山

谷中湧泉深不可測一日三潮風浪如雷昔時白馬

自泉出田野間雲擁之復沒名曰白馬泉又曰龍淵

又曰龍門有宋紹興間祈雨碑猶存 此州韻事有

雙鳳亭在署廳後爲蘇子瞻子由設至和中老泉携

二子謁太守雷簡夫雷以書薦於張文定公及韓魏公歐陽文忠公其後太守樊汝霖作堂以表其事無絃亭在州學南長濱江側隱士王潛所居潛好琴趙清獻公爲榜其亭曰濯纓文同書 黃魯直木蘭歌帖梁甫吟帖俱在郡治 竹溪在郡西三十里隱士胥九鼎所居陶仙洞在焉有林泉之勝魏了翁寄題胥園詩云胥君頎然來錦囊背奚奴探囊發詩卷一一卿大夫未識胥園面詩卷自畫圖掃石臥竹影長鐫斲芋區胥君子此時林泉傲金朱

名山縣

禹貢蔡蒙旅平蔡屬雅州而蒙屬當縣矣九州記云蒙者沐也言雨露常蒙也山有五頂最高者名上清峰有甘露井水極清冽四時不涸相傳漢僧理眞所鑿後日隱化井中圖經云蒙頂茶受陽氣全故芳香獨烈方輿云虞允文嘗爲名山監茶今清溪橋頭北廳猶在有梅及槐柳皆雍國手植壁間遺墨尙存水經注曰縣有蒙山青衣所發東逕其縣與沫水會於靈關道寰宇云平羌水上源曰邛崃水又名平鄉水西北自嚴道縣流入自眉州洪雅縣界下又名青衣水本志云五頂山下青衣河流遶縣前下田水口

入嘉州 寰宇記云羅繩山在縣西五里從蒙山西
接入蘆山縣又北接邛州火井縣又云雞棟山在縣
西南十七里地理志以蜀有雞鳴山俗傳金雞鳴天
下太平也紀勝云雞鳴山即古之名山因爲名山戍
碑目云名山治東一里許有紫府飛霞洞開禧丁
卯邑人苟洙於梓潼觀後發一洞穴刻神之父母像
併鑿石龍蟠於其中請神作記親書於石今石龍書
院是也 本志云東北三十四里古土城周七十二
丈乃武侯征蠻所築遺址見存 寰宇云大幕山在
縣東四十里南接河羅戍北入邛州高七十里上聳

天際靈恠錯雜之所 九州要記云百丈縣本嚴道
縣地李膺記臨邛縣南百二十里至百丈即其地圖
經云有一穴口方圍百丈深如之山有九折坂夏則
凝冰冬則毒寒漢王陽爲益州刺史行部至此興歎
因之棄官唐武德元年置百丈鎮貞觀八年改鎮爲
縣今之驛曰百丈里曰安賢 本志云百丈河在東
北六十里源自蓮花山來經百丈驛東與邛水合流
至新津入白馬河又名千尺潭又云百丈縣南五里
銅鼓山爲漢唐戍守之地 寰宇記云泉池山在百
丈縣東四十里山四面懸絕上有泉池因名 本志

又云東南七十里佛鼻山左右有二目謂之天目元時於左目下建寺曰天目有大石甕小石甕之名

榮經縣

寰宇記榮經縣本嚴道縣地東西連接大山並無州縣巖巒阻絕不辨疆界唐武德二年置縣因界內有榮經水口戍爲名本志云榮水在城北一出相公嶺一出番境經水在城南一出瓦屋山一出改丁河一出汶川按相公嶺者以諸葛丞相征蠻所經也改丁河源出黑石汶川源出邛崃馬耳榮經水北流入擒孟渡卽孔明七擒孟獲之地 方輿云瓦屋山在榮

經縣東北二十里形如瓦屋上有念佛鳥娑羅花其巖朝現辟支午現普賢夜有神燈或問禪惠大師瓦屋何故卻以木皮蓋師曰錦府豈從機上織劍門甯自匣中開李燾詩瓦屋如廡平金仙闢光景 雅安志云榮經西北三十里紫眼關以紫眼番人僑寓得名卽甕溪關 寰宇云邛崃關在縣西南七十里隋大業十年置約山據險當雲南大路以扼番夷之要害碑目云邛崃關開路記天寶六年章仇兼瓊撰又云漢蜀郡太守治道記碑在榮經縣西三十里建武中元二年立又云尊樅閣碑建武中元二年物亦在

縣西三十里景峪懸崖間巽巖李肅有跋以辨正年譜且引後漢紀建武三十二年夏四月改爲中元無建武字又按祭祀志改建武三十三年爲建武中元元年以此知記與志合而紀失之矣又云神水閣記碑在榮經縣東三十里銅山峽中碑久磨滅不可考古老相傳其體大率如尊榘閣云

蘆山縣

寰宇記云蘆山縣亦嚴道縣地晉書地理志姜維於此置城隋仁壽元年重開此地遂於姜維古城置蘆山縣以界內蘆奴山爲名按紹興二十三年徐閔中

記土人祀姜伯約有廟額曰平襄 志云治有開明王城故址華陽國志蜀王開明以靈關爲前門寰宇云靈關山在縣北二十里峰嶺嵯峨傍夾大路下有山峽口闊三丈長二百步俗呼爲重關通蠻貊之鄉入白狼夷界漢書通靈山有眼孔四一名鑿靈山文選註靈關山名在成都西南漢壽縣界陳陰堅蜀道難云王尊奉漢朝靈關不但遙高岷長有雪陰棧屢經燒輪摧九折路騎阻七星橋蜀道難如此功名詎可要隋孔德紹送蔡君知入蜀云靈關九折險蜀道二星遙乘槎若有便希泛廣陵潮按張揖注史記曰

漢鑿開靈山道於此置靈道縣矣 寰宇記云盧奴山在縣東五里與始陽山相接始陽山在縣東七里本名蒙山唐天寶六年勅改爲始陽山高八里東道控川歷巖道縣橫亘入邛州火井縣界又云大渡水從生羌界來流入浮圖水浮圖水在縣五里從生羌界來水中有孤崖狀如浮圖出貢金 志云蘆山南十里三江渡通天全六番下注多功峽如雅之平羌江多功河上飛仙閣爲木棧道卽古漏閣也 方輿云龍頭山在蘆山縣前後峽綿亘四十里天矯如龍控接番部實爲要害又云崖鉢山在縣西二百里上

聳雲漢莫測其高 志云漢樊敏墓在縣南七里前有二石馬隸碑在石馬東碑目云漢故檢校巴郡太守樊府君碑建安十年三月上旬造又云兩面碑在蘆山縣南五里與府君碑甚近碑面與背皆有篆文歲久訛闕不可識或辨其文曰蘆山縣碑 宋趙明誠金石錄云右漢巴郡太守樊君碑其文云君諱敏字叔達肇祖虛戲遺苗后稷爲堯種樹舍漆從岐天顧宣甫乃萌昌發周室衰微雲伯匡弼晉爲韓魏魯分爲楊充曜封邑厥土河東肆漢之際或居於楚或集於梁君纘其緒華南西疆又云總角好學治穀氏

經貫究道度無文不睹於是國君備禮招請濯冕題
冠傑立忠譽有夷史之直卓處之風鄉黨見歸察孝
除郎永昌長史遷宕渠令大將軍辟光和之末京師
擾攘雄狐綏綏冠履同囊封挾長驅車走枕北國復
重察辭病不就再奉朝聘七辟外臺嘗爲治中諸部
從事又云季世不祥米巫刑虐姦狡並起陷附者眾
君執一心賴無沔耻復辟司徒道辭不往牧伯劉公
表授巴郡以助義郡尉養疾閭里又辟奮義都尉年
八十有四歲在叶洽紀驗期臻奄忽藏形其後有銘
題建安十年二月上旬造他漢碑類多刊缺而此碑

首尾完存故載其大略於此所謂米巫凶虐者謂張
角也宋成都丘常跋云此碑相傳名魏受禪碑爲世
絕出而其款乃建安十年又在黃初之前雖暴露中
堊而字畫醕古文尙可讀豈非所寓僻遠而人無知
者歟然而千餘年間霖雨之所濯盛陽之所暴有獸
已倒有門已摧而此碑將仆是可憫也余因扶其旣
倒植其將仆又爲屋以庇之庶幾永其傳也崇甯壬
午知縣丘常題 宋程勤跋云皇上勵精更化以揚
祖宗之大烈屬當京師父老流涕太息思欲復見漢
官威儀之時而僕仕於廬山天下最窮處迺得建安

十年巴郡太守樊君故碑於荒山榛莽間亟作大屋覆其上表而出之目其顏曰巴郡太守樊侯之墓嗚呼碑陰所記崇甯壬午距今五十八年而遙任斯邑者皆吾鄉人扶倒植仆偶相似然豈物之廢興固有數耶紹興己卯眉山程勤懋傳書 國朝李一本跋云此碑踞於道周迨今幾千有餘歲矣在宋以前訛爲魏受禪碑大明一統志謂其字文漫滅不可攷以故惑於聞見者不爲注目予捧檄竊祿於茲屢經過焉見其荒於荆榛蝕於莓苔亦謂信然越弘治乙未仲冬因偕門生白應清駱琰陳宣宋萬全等訪故偶

過其下因束篠爲帚掃拂之倏見字畫隱隱而出皆醇古迥異從者進曰此商彝周鼎復出也殆奇遇乎亟爲磨洗尋具楮蠟如法摹搨得墨本有三益以防字畫之同異者而考正之然其模糊不可讀者亦過半矣旣而歸置軒次校以隸本參以眾目就其可識者僅得什之九其疑誤者則傍爲點注以俟博古者正焉載考古文苑所紀樊毅樊安等碑亦靈獻中所作其屬辭比事與此文勢相類或者當時史遷之徒爲之也夫文選所集皆秦漢以來古文而此碑獨不見錄古文苑乃補文選而作又不見載毋亦此地僻

在遐荒而人不知歟抑或於聞見之似而不及錄歟
 吁是碑雖不見錄於古幸而石不泐壞延有今日得
 以附入邑志以永其傳亦奇矣匪徒為斯邑之炎實
 斯文之幸也然則世之為志者苟徒據耳之所托而
 不博歷以致審焉則雖有石鼓之文其不至於湮沒
 無聞者幾希矣是月十一日長至後忠南李一本識
 蘆山廣文也

蜀中名勝記卷之十四

蜀中名勝記卷之十五

閩中曹學佺能始著

下川南道

敘州府 宜賓縣附郭

水經云江水又東南過夔道縣北若水淹水從西來
 注之華陽國志云夔道縣治馬湖江會輿地廣記云
 馬湖之上源曰若水出旄牛徼外南經三絳淹水注
 之又東經越嶲之馬湖縣為馬湖水又東北至朱提
 縣與瀘水合至夔道入大江 夷裔考云夔人者其
 先世本華人有罪貶遠方以棘圍之故其字從棘從

人漢制郡縣有蠻曰道故曰夔道其俗每歲六月廿四日爲星回節競舉火把盈野居傍城郭與漢人無異水經註引地理風俗記曰夔於夷中最仁有人道故字從人秦紀所謂夔僮之富也者其邑漢高后六年城之武帝感相如之言使縣令南通夔道費功無成唐蒙南入斬之乃鑿石開閣以通南中迄於建甯二千餘里山道廣丈餘深三四尺塹鑿之迹猶存王莽更曰夔治也 郡國志云夔在諸夷中最賢者多以荔枝爲業園植萬株歲收百五十斛益州記云荔枝灘在夔道縣山頂有一冢惟生女貞樹樹上常有

白猿棲息古謂之玉女冢志云卽峰巖也在宜賓西百里山坡荔枝連袤今多屬廖氏黃魯直詩廖致平家綠荔枝卽此 圖經云夔道縣故址有三漢武帝時在中方鄉卽今西南與長甯界接唐太宗徙於蜀江之右二江口卽今府治武宗會昌中以大水復徙於蜀江北岸卽今舊州 輿地紀勝云西漢夔道卽漢武遣唐蒙鑿石以通南中者今石門是也本志云石門江在府西南百三十里俗呼橫江又名小江唐書韋臯傳石門卽隋史萬歲南征之道故有詩云石城門峻誰開闢更鼓誤聞風落石界天白嶺勝金湯

鎮壓西南天半壁按本傳萬歲入南中見諸葛亮碑
銘曰萬歲後勝我者過此 方輿勝覽云蘭山在夔
道縣界圖經云蘭生於深林石門尤多有春蘭秋蘭
崇蘭鳳尾蘭竹蘭石蘭諸名春蘭花生於葉之下崇
蘭花生於葉之上黃魯直幽芳亭記一幹兩三花而
香有餘者蘭一幹十數花而香不足者蕙 水經註
云夔道縣有蜀王兵欄其神作大灘江中崖峻阻險
不可穿鑿李冰乃積薪燒之故其處懸崖猶有赤白
玄黃五色照水魚從楚來至此而止言畏崖嶼不更
上也本志云西北二十里朝陽崖是 華陽國志有

孝子隗通爲母汲江裔水天爲出平石生江中今石
在馬湖江口 益部耆舊傳曰張貞妻黃氏女也名
帛貞乘船覆沒求屍不得帛至沒處灘頭仰天而歎
遂自沉淵積十四日帛持貞手於灘下出時人哀之
語曰符有先絡燹有張帛 寰宇記曰夔道縣
有貞婦石在縣七里舊州岸古老相傳昔有貞婦夫
沒無子事姑甚孝姑抑使嫁竟不從終姑之世身沒
所居室有一大石湧出後人號爲貞婦石 黃魯直
跋王荆公書云熙甯中金陵丹陽之間有盜發冢得
隱起輒於冢中識者買得之讀其書蓋山中宰相陶

隱居墓也其文尤高妙王荆公常誦之因書於天慶觀齋房壁間黃冠遂以入石予常欲摹刻於夔道有李祥者聞之欣然礪石來請斯文既高妙而王荆公書法奇古似晉宋間人筆墨此固多文廣見者之所欲得也李君字聖祺夔道人喜炎黃岐雷之書嗜好酸鹹與世殊絕嘗從軍得守國子四門助教歸而杜門家有山水奇觀教諸子讀書而宴居自如從其所好不喜俗人一再見輒罵絕之此孟子所謂有所不爲者也 朱提漢舊縣屬犍爲郡東漢屬犍爲都尉蘇林云提音時晉太康地志云章武元年先主以犍

爲屬國爲朱提郡鄧方爲都尉先主因易名太守領漢陽等五縣朱提縣治有千秋池今府西南六十里有朱提山山下有大池曰瑞蓮池是又有朱提村今卽立郡處也諸葛武侯云漢嘉金朱提銀采之不足以自食古志云朱提西猶有鳩鵲以南則無矣 志云瑞蓮池在府西南六十里馬湖江側故老傳云江有石生魚常游聚漁者甚利之一日獲巨鯉眾分食之翌日又至俄見江中有三石室各長丈許廣七尺人咸異之顧見對岸石亦有三穴如鑿去者其長短與此無異而向之食魚者所居皆陷沒爲池矣巨鯉

蓋龍子也池有無種蓮或間十數歲一花花開則國
家有大吉事舊志朱提縣有千秋池疑卽此今在朱
提山麓按華陽國志云崩江多魚此之謂矣 寰宇
記云開邊縣在州西南六十里亦焚道地隋開皇六
年於此置縣以開拓邊疆爲在馬湖朱提兩江口又
大黎山小黎山在此縣界四時霖霪不絕俗以爲大
漏天小漏天其諸山自嘉州以來每峰相接高低隱
伏奔走三峽石狀難名本志卽今之開邊鄉也 寰
宇記又云宜賓縣本漢南安縣地屬犍爲郡蜀諸葛
亮南征於此置郁郾戍後改爲郁郾縣唐開元十七

年爲義賓縣後移於狼川卽今理也宋朝開寶九年
改爲宜賓縣 通志云宣化縣在宜賓縣境本唐之
義賓宋之宣化今省入者舊址在當縣之宣化縣
水經注云存水出犍爲郁郾縣王莽之孱郾也夷率
雍闔繫馬於柳而柳成林故曰存馬本志云縣西北
百六十里爲郁郾灘 蜀志補遺云可無山古宜賓
縣也今訛名可虛 方輿勝覽云夷牢山在宣化縣
南夷人祭社於此飲酒歡樂夷語以牢爲樂故也二
蘇有過宜賓見夷牢亂山詩輿地紀勝云宣化縣南
山叢秀中一峰突出爲菩薩頂故老嘗見聖燈碑目

云宣化上流三十里吳季成所卜築在山之阿有山谷老人所書盤谷序虔州學記碑刻本志云復魚池在府西北百七十里故宣化縣東宋皇祐間白雲先生張俞爲記 寰宇記云梁武帝使先鐵計定夷獠乃立戎州以鐵爲刺史方輿云宋紹聖四年戎倅蘇時上書曰今車書同聲教一而州名戎是夷其名也請易之遂改名敘州 唐劉兼秋夕書懷呈戎州郎中詩素律初回枕簟涼松風飄泊入華堂談雞寂默紗牕靜夢蝶蕭條玉漏長歸去水雲多阻隔別來情緒足悲傷霜砧月笛休相引只有離襟淚兩行

碑目唐都督李通破賊碑在州南百里今亦殘缺又云唐古戎道碑在州治對西天蒼山崖壁間筆畫勁正乃乾封二年詹君秀修復此道爲之記并書又云定誇湖碑在戎州城外有唐人所立碑曰山蒼蒼兮煙際橫波渺渺兮湖水平其餘漫滅不可考 古跡考云縣有張儀同城古老相傳以爲張儀同祠也不知何義魏鶴山集有樊道諸葛武侯碑又有荅馬敘州邦佐謝武侯廟碑啟本志云府城南姜維屯一峰突起高千仞其頂平相傳姜伯約於此駐軍 勝覽云敘州有東州道院在州治內碑目云治東墨妙亭

貯黃庭堅筆跡 杜甫宴戎州楊使君東樓詩勝絕
驚身老情忘發興奇座從歌妓密樂任主人爲重碧
拈春酒輕紅擘荔枝樓高欲愁思橫笛未休吹劉兼
重陽感懷詩重陽不忍上高樓寒菊年年照暮秋萬
疊故山雲總隔兩行鄉淚血和流黃茅莽莽連邊郡
紅葉紛紛落釣舟歸計未成年漸老茱萸羞戴雪霜
頭 勝覽云東一里花臺寺卽今壽昌寺也東殿石
壁露立大像其地內外石間鐫有萬佛卽刺史張九
宗撰記處 又云東山在州城東門外有報恩寺塔
高二百尺南望七星山七峰團秀狀若連珠卽南山

也 方輿記云西樓在州治陸務觀詩畫船衝雨入
戎州縹緲山橫杜若洲須信時平邊堠靜傳烽夜夜
到西樓 碑目云韋南康紀功碑在江西舊州治岸
唐元和五年刺史張九宗立碑陰載南康謝表大半
磨滅又云唐黎幹墓表在州西岸石馬溪之上今石
馬尙存 本志云馬鳴溪在府西十九里俗稱龍馬
溪源出慶符縣西會馬湖水達於蜀江昔土人鄭氏
牧馬於溪上產龍駒四蹄利爪朱鬃尾高可七尺
州聞之將以貢行在所載至溪口攘鬣長鳴躍於江
溪因以名 寰宇云滇池在州西二十里一名天池

一名波凌池其池長五十里闊七里風雷一動波浪
凌山中有芰荷按秦惠王破滇池始通五尺道者卽
此也志云滇池與天池相連大者廣一里長五里小
者廣一里長三里其中有石橫亘南北如橋梁狀往
來由之唐韋臯天池晚棹詩雨霽池塘生意足花間
誰詠採蓮曲舟浮十里芰荷香歌發一聲山水綠春
煖魚拋水面綸晚晴鷺立波心玉叩船歸載月黃昏
直至更深不假燭宋牟孔錫詩天池十里如盤湖荷
花可折魚可繪 本志云縣西五十里水濱昔有浮
舟者見空中飄然降一道人止於峰頂土人呼其處

爲師來山後訛爲書樓山 勝覽云無等院在州南
門外魯直以元符間寓居作槁木寮死灰庵今猶存
其寺額亦魯直筆蹟陸務觀詩文章何罪觸雷霆風
雨南溪自醉醒八十年間遺老盡壞堂無壁草青青
李嘉謀記紹興初章蔡用事山谷以前史官得罪
安置黔州二年移戎州方公之遷以涪州別駕因自
號爲涪翁放浪山水間初不知有遷謫困窮之意城
南有溪公遊而樂之命曰涪溪其後溪山悉以是名
本志云舊戎州南門外里許金魚井山谷品其水
爲第一 寰宇記云鎖江在城北兩岸大石屹立因

置鐵絙橫截其處控扼夷羌黃魯直鎖江亭酌酒詩
西來雪浪如魚烹兩崖一葦乃可橫酒盃未覺浮蟻
滑茶鼎已作蒼蠅鳴又云山繞樓臺鐘鼓晚江觸石
磯礎杵鳴鎖江主人能致酒願渠久住莫終更又云
鎖江亭上一樽酒山自白雲江自橫李侯短褐有長
處不與俗物同條生蓋同李子任道也又安樂泉頌
云鎖江安樂泉爲挾道第一姚君玉取以釀酒甚清
而可口食之令人安樂故予兼二義名之曰安樂泉
并爲作頌姚子雪麴杯色爭玉得湯郁郁白雲生谷
清而不薄厚而不濁甘而不噉辛而不螫老夫手風

須此晨樂眼花作頌顛倒淡墨 本志云北二里鬱
姑臺相傳宋楊仙遇鬱姑於此 又云蘇溪在府北
二里以蘇子瞻常遊於此故名 輿地紀勝云自州
治沂流十里有前後潭瀑布自懸崖千尺而下本志
又云水簾洞在府北十五里瀑布瀉出兩峰間垂數
十丈如珠簾狀其側有亭黃山谷扁曰奇觀何師心
滿江紅詞一水飛空揭起珠簾全幅不須人捲不須
人軸一點不容飛燕入些兒未許遊魚宿向山頭欸
步聽疏音清如玉三峽水堪人掬三級浪堪龍浴更
兩邊蕭灑數竿修竹晚倩碧烟爲純綠夜憑新月爲

鈎曲問當年題品是何人黃山谷 又云北百二十里真溪源出於匍山舊有姓真者居之今爲真溪驛又云北百七十泥溪有阿泥者居其傍故名今之月波驛是余以壬子暮秋宿此驛書懷作云月波來夜宿月色似波明遇景一相湊觀空聊復情寒蟬吟似懶水鳥去何輕借問渝州路還家近幾程蓋亦情見乎詞矣

南溪縣

漢地里志武帝太初元年置南廣縣隸犍爲郡蜀志後主延熙中立爲郡以常竺爲太守元和郡國志晉

分朱提郡置南廣縣齊郡廢後周於此置南武戍隋改龍源戍又改爲南溪縣在犍道之南 水經注云自朱提至犍道有水步道有黑水羊官水三津俱險極難行故行人語曰檣溪亦木盤蛇七曲盤羊烏攏氣與天通禹貢華陽黑水惟梁州註云出南甯州南廣縣汾關山北至犍道縣入江一名皂水 郡國志犍爲郡故城在青衣江七里舊經云青衣江在南溪縣南十五里古有青衣國與敘州相隣其人因賈至蜀見漢衣冠遂求內屬因以名焉其地名龍騰溪卽隋之龍源戍今之龍騰驛是也 按青衣蜀中見

者凡三其一在漢嘉者卽大渡河所經漢書公孫述僭據青衣人不賓是也其一在青神者以蠶叢衣青而教民農事人皆神之是也其一在當縣以古有青衣國慕義來賓云 志云龍騰山半有洞深四丈李八百所鑿額鐫曰李公洞八分體字畫遒勁可觀洞前有折梅亭宋楊萬里詩李真宅子故依然道院西徧石洞前一日身遊八百里三番花落九千年 龍騰山下有岑參別業參從明皇幸蜀尋守嘉州置

國朝成化中掘得斷碑有南溪州三字傍題唐人岑嘉州參別業岑嘉州詩曰結屋依青嶂開軒對

翠疇樹成花兩色溪合水重流竹徑春來掃蘭樽夜不收逍遙自得意鼓腹醉中遊 志云溪北有橋曰黃渡魯直每遊龍騰山必經此橋故名唐韋莊詩大江西面小溪斜入竹穿松似若耶兩岸巖風吹玉樹一潭明月照銀砂因尋野渡逢魚舍更泊前灣上酒家去去不知歸路遠棹聲烟裏獨嘔啞蘇軾南溪對雪詩南溪得雪真無價走馬來看尙未消獨自披榛尋履跡最先犯曉過朱橋誰憐破屋眠無處坐覺村居語不囂惟有暮鴉知客意驚飛千片落寒條皆此橋中景物 寰宇記云馬湖江從州西南流出東郭

與蜀江合諸葛武侯五月渡瀘則此水之上流也
郡國志云乞子石在馬湖南崖東石腹中流出小石
西石腹中懷之焚人乞子於此有驗因號乞子石竇
字云乞子有二石夾青衣江相對立如夫婦古老相
傳東石從西乞子將歸 魚鳧津按郡國志云南溪
縣西三十里有津津南有鴛鴦圻是也鴛鴦圻者以
烈婦黃帛得名詳見焚道今縣有帛廟子在飛霞閣
西阜上阜有飛霞井嘗有赤飈自井中貫日觀者如
堵因建飛霞閣焉 祠廟記云南溪琴山有忠利廟
祀漢牂柯太守陳立廟中有制祠古碑張鼎修所記

負山濱江地勢險阻 志云治西彈琴臺唐楊發彈
琴於此瘞琴其下父老言每夜靜人或時聞琴音發
亦家於此有南溪書院詩云茅屋住來久山深不置
門艸生垂井口花落擁籬根入院將鷓鴣鳥攀蘿抱子
猿曾逢異人說風景似桃源 志又云隔江琴山橫
洲渚間俗云無微則琴不鳴元時熊萬戶者乃聚土
爲微依巖建閣刻羅漢諸像以成其勢 輿地紀勝
云東南逾江七里有隱山唐李涉詩如雲不厭蒼梧
遠似雁逢春又北飛惟有隱山溪上月年年相望兩
依依 又云銅鼓灘在縣東十里大江之右波浪極

險縣治坐乾此水出辰爲不利近歲灘之上流生石
積高十數丈蔽壅下流水從巽出自是文物稍振
寰宇記云西南十五里平蓋山山有九隴惟此特出
羣山之上頂圓似蓋一名瑪瑙山漢真人劉景鶴隱
此至魏武時始跨鶴仙去有石洞深邃不測中有小
穴圓如蓋有水出焉山上有木生葉其紋如篆謂之
符葉 志云西七十五里桂輪山昔涪翁書大桂
輪山四字於其岸壁是山惟中秋見月故名有桂輪
山寺

長甯縣

圖經西徑馬湖南控烏蠻東介安溪北接綿水趙招
討平夷表云左連阿水右連石門也 碑目云長甯
志嘉定己卯教授賀寅東序亦云祥符平夷本末慶
厯皇祐平夷略元豐平乞弟本末嘉祐三年給長甯
頭首斗蓋充土刺史誥熙甯七年范中書百祿誓夷
文皆有可攷 十道志云長甯清井監供輸紫竹本
志云縣西北七十里古賢鄉宋時鐫崖曰紫竹山是
也方輿引舊郡志今夷眾開筭路芟去筇竹惟冬蒟
醬可以入藥 寰宇記寶屏山縣治之主山也與械
山諸峰相對登雲亭在寶屏山上每歲九日登高於

此紀勝云牛心山在縣治山形率律如牛心然硯石溪在牛心山後岸石如磬可以爲硯東溪發源句崖山與嘉魚泉合嘉魚泉者去城一里馬鞍山之趾泉激石湧出小魚四時如一不增不長故以名之邦人釀酒必用山後林及嘉魚泉則味甘冽王章嘉魚泉記兵厨之酒冠於東州其上有臨流閣流杯池諸勝志云南一里金龜山四面平疇中突一阜如龜狀又名松子山輿地紀勝以其上有波瀾殿舊志邑人於四月八日取嘉魚泉浴佛故曰波瀾也勝覽云介湖在郡治西城下中植荷芰有西溪發源越

王山與桃源溪合此溪相傳有耕者得一銅版鐫曰小桃源其陰有詩云綽約去朝真仙源萬木春要知竊桃客定是滑稽人其水發源筆架山在軍城冷水溪上嘉定乙巳太守張公市民田種植桃李創置亭榭橋曰仙津洞曰桃源亭曰蒸霞堂曰詒然通志云萬松嶺在長甯縣西宋趙使君詩清溪狹逕小橋東春日桃花處處同我爲日長無一事偶然來此聽松風紀勝云小離堆在城北岸溪上崇德廟前溪中有甍石似離堆之象因作亭於此榜曰小離堆燕巖去縣北三里許在棲真洞路旁石峰巉巖森列

者數百處易簡有記 本志東西二溪至清井合流
名清溪至武甯岩爲武甯溪至安甯岩爲安甯溪
碑目載王蜀武成三年牒清井鎮羈縻清井土刺史羅元
都虞候羅元審又牒清井鎮羈縻清井土刺史羅元
楚文俱在本監 歸田錄載蘇子瞻常得清井監夷
人所賣蠻弓衣其紋織成梅聖俞春雪詩蓋當時名
重傳落夷狄故也 本志云東十五里武甯溪上有
巨石橫截中流虞允文鑿之以通舟楫石上大鐫虞
公峽三字溪左涇灘有瀑布自山頂飛流而下數十
丈爲深潭 輿地記云越王墓在甯遠巖高廣各數

丈以花磚砌有合抱古柏故老傳爲越王墓或云唐
太宗子越王貞爲綿州刺史卒葬此 志云治東九
十里有凌家崖有水流寺遠眺敘瀘之景大江如帶
焉

富順縣

華陽國志云江陽富義有鹽井郡國志劍南鹽井惟
此最大舊日爲額八百餘觔今日額千五百餘觔楊
光清操堂記云三榮富順產鹽其地號爲貪泉韓子
華詩土瘠事刀耕家無終歲蓄所資鹽井利持易他
州粟方輿云宋太宗朝置監有榕齋在監治以榕木

名也 水經注綿水湔水與洛水會逕牛鞞資中又東逕江陽縣方山下入江按此水至富順神龜山下縈紆向西而去謂之洛源以源出洛通江也後周於此置洛源縣亦謂之金川以綿洛湔三水會於金堂峽也秦時於此設金川祠亦謂之釜川則以其盤繞縣治有若釜形然 寰宇記云雞足山同心山俱在城東隔水三五里教授錢士開記翠巘絡繹張其前大江繚繞環其下 輿地紀勝云神龜山下有湖嘗見大龜出小龜從之不可勝數山背有讀易洞里人李睨讀易其中也李昌金川驛記南距戎瀘北走

普資舊制等於諸縣嘉祐以新例擬於列藩本志云金川神廟在縣西二百餘步有十像莫知姓氏相傳秦惠王時擒鰲治水有功卽此神也 勝覽云凌雲山在監西與養秀山相接大江前橫一峰突兀瑪瑙山亦與凌雲相接西北諸山惟此最高 又云西湖在監之西相傳有此監卽有此湖皇祐間周侯延雋記仍有亭榭輿地紀勝云西湖周迴三里有洞窈邃昔有入洞者見二女櫛髮於此間遺以石鏡其人致富又名勝志西湖洞前崖上鑄觀音大士像天禧元年刻石記六月甘露降佛前明日又降紹聖元年時

又降瑩深如珠程驤富順西湖詩云春風楊柳曉藏
鴉秋水芙蓉晚着花細數一年湖上景天涯行客忍
思家 志云西五里中江之右有峰峭拔數丈如佛
像傍有二石如侍者對立因鐫成之藤蘿遶身而不
上其面輿地紀勝謂之聖佛有磨崖碑皇祐七年知
監張齊古題云西山城郭泐灘數里羣峰重疊一佛
獨立容相端正真如塑出高聳數丈古代留跡後倚
林翠前瞰江碧 西疇在縣西南七里輿地紀勝云
由城南絕江而上西行六七里廣六十畝萬松森列
嘉樹鬱葱爲李氏西疇晁公武記云有亭臺齋館泉

石花木盤據一山之上 方輿云聖燈山在監西五
里碑目云山趾有董孝子墓表云漢益州刺史廣平
郡侯董孝子 紀勝云中崖山在西北二里山勢盤
礴林木葱茂有叢林氣象有霧隱堂資中趙丞相沂
公謁中崖大士或以夢告明年舉於鄉公爲文記之
後人爲建斯堂碑目中崖普覺院天禧丁丑賜名康
定二年翰林學士李淑撰碑志云中崖以北崖山居
左瑪瑙山居右此居其中故名唐咸通中依岸鐫大
悲佛像宋初僧自悞架屋三百楹天聖丁丑賜名普
覺院藏兩朝宸翰後林靈素毀佛法欲壞其像圍繞

鑿之不損乃以泥覆之罷禁將水洗去依然如新岑
象求中崖詩瀟灑監城隈聊驅俗駕回世塵飛不到
山色翠成堆太常博士周延雋詩茲辰始休沐夙駕
出公府往造釋子居嶽崎僅容戶雲林信樂耽安問
非吾土眾香纔發春微雲忽蔽午石上煎佳茗忘囂
攀芳杜徘徊仍少留歸泛凌前浦卻顧衣上塵猶霑
山際雨 志又云北崖在縣北二里隋大厯中建資
國寺有彌陀崖足容數百人有五百羅漢洞有水簾
並元祐八年李元淵記

慶符縣

漢置屬犍爲郡蜀先主置朱提郡以縣屬焉華陽國
志云有漢水入延江本志云漢陽山在縣北八十里
漢武通西南夷自此山之南皆漢地故云諸葛武侯
征蠻過此今崖壁上鐫武侯征蠻故道六字猶存縣
有順應廟乃祀馬謖者我明永樂中尙書宋禮奏神
有陰助運木之功賜萬貫葺其廟命有司每歲三月
二日致祭焉 碑目晉張麟夫人墓表在慶符縣南
百六十里又云大唐南詔王碑在石門界貞元七年
袁滋題云此石門卽隋史萬歲南征之道 志云祥
州故址在縣西一里初本南廣地宋改名祥州置慶

符來附二縣而南廣爲鎮宣和中省州止存慶符縣
黃山谷所書戒石銘尙存今來附縣爲來復舖矣

筠連縣

漢定川縣唐之筠連州也其地南通芒部西控烏蒙
四山皆竹一色相連因謂之筠連 志云舊州黃牛
山距縣南三十里高山石壁有人作驅牛狀因呼爲
黃牛山也又云縣西南孔雀溪有孔雀巡檢司土舍
主之

高縣

志云唐高州故址在縣南百二十里縣有宋水水流

屈曲如宋字有騰山常孕霧雨俱在西南五十里外

珙縣

唐羈縻薩鞏二州也薩州今之下羅計鞏州今之羅
星渡 志云治南北五十步卽珙溪也石多似玉民
以筒車引水入田得灌溉之利又云落峭山有生成
石鼓二石鼓坳下有仙洞石乳凝聚如人如獸千態
萬狀至洞頂黑質白章如雲如篆又云縣北四十里
芙蓉山有九十九峰其南三峰突起謂之小芙蓉

興文縣

戎州故址在甯遠坊之西唐晏州羅楊郡領思義柯

陞中各用言
陰新賓扶來思晏哆剛羅楊七縣今皆屬夷南五里有南壽山宋時夷酋卜漏據山爲砦一豆一蠻數有五斗故名五斗夷又十五里有丹霞箐旦暮霞彩浮於木杪

隆昌縣

隆昌新設之地古跡無聞予問諸劉給事有金鷲洞焉溪水東來遶城西折里許孤山柱立水環其趾下爲懸崖壁立千尺飛流下墜常時如匹練如散珠及至溪水暴漲倒立懸垂雷聲衝激聞數十里細霧麈塵飛灑千步亦奇觀也峭壁中有洞方廣丈許人跡

難至疑鬼工所鑿名曰金鷲不知所本俗傳有藏金鷲其中或以銅鷲換之故又名換鷲洞其編戶亦有換鷲里

馬湖府

屏山縣附郭

龍湖去郡三百里許四圍皆峻崖長二十里廣七里中有堆如螺髻去大江二里其水與江同消長日夕作潮相傳有龍馬見於此 四夷考云馬湖江發源西番流至打冲河入會川衛與安甯河合經雲南與浪滄河合至武定與金沙江合經東川烏蒙始達於蠻夷司界經府前流出與敘州江合 志云馬湖有

故城唐乾符中高駢築按馬湖所轄地漢之營縣平夷縣唐之瀉浪州沐川寨也漢書營有不狼山營水所出隋志平夷縣有砭津宋史寇瑊祥符中爲轉運使哆剛夷斗望叛瑊集瀉浪刺史箇松李紹等平之志云平夷東北二十里有書樓山編戶爲書樓鄉又云府西三百八十里雷番山隋史萬歲征西南夷過此書雷番山三字鐫於石壁山中草有毒經過牲畜必籠其口行人必緘默若或吐聲雖冬月必起雷霆碑目沐川古碑唐垂拱三年玉津令馬元慶等破馬湖夷紀功者張無盡沐川寨記畧云南蠻東北接

境常挾吐蕃以爲中國患蓋其路一出大渡河一出沐川源一出馬湖江其狹邪之徑曰榮涇曰八面箐曰黑水曰中鎮曰賴因曰龍水曰陰川而沐川之路常爲嘯集之地云

蜀中名勝記卷之十五

